

# WANTOK

OCEAN BLUE

Tuna in oil  
Rait teist  
yah!



...SPEPA BILONG ...OL PNG STRET!

Wan Wik, Jandera, 16 ... 2006

NAMA 1343 K1.00-long Moshit

Ausait Mesbi K1.30

## INSAIT:

**RAMU  
SUGAR**

WIKSI SKIN FI DESISA  
I que K1.00-0.50  
FI MESH ...  
- Lida Par 4

MUS ...  
Bogorvil - Par 4

LAIPSTAL: ...  
Par 17 na 18

## LAS AMAMASI!

SAN, SOLWARA NA PIS: Klostu bai  
skul ...  
ol bai go ...  
rating long haus na ...  
long Ela beach, ...  
bilong Pot Mesbi ...  
painim pis na ...  
selo ...  
save ...  
klostu long wambis na olge-  
ta taim ol i save kamdaun  
long solwar, taim ol i  
nogat samting long  
mekim. Ol i save skul  
long Sen Francis  
...  
wetim tasol skul bai  
op gen bilong dis-  
pela yia.

# Yali no moa memba

**KOMENTRI:** Lida i mekim pasin  
reipri noken karim nem lida

"Yali i bin pinis olsem memba long namel long mun  
Desemba 2005. Em i ken kisim bek nem olsem memba  
sapos apil kes bilong em agensim sas bilong em i karim  
kaikai bipo long givim aut bilong ol rit pepa bilong bai ilek-  
sen. Tasol nau yet, em i no Memba bilong Palamen moa," -  
Sir Peter Barter, Minista bilong Inta-Gavman Rilesens  
Lukim stori na moa tok kila long PES 3

# KEEP YOUR TOYOTA GENUINE

For a limited time only we are offering special pricing on ...

### SUSPENSION

Toyota Genuine Shock absorbers are specifically designed for each individual Toyota model to optimise handling performance and safety.

### CLUTCH

Toyota Genuine Clutches feature torsion rubber springs that provide balanced and quiet operation for a more comfortable driving experience.

### BRAKES

Toyota Genuine Brake pads and shoes provide strong and stable braking combined with outstanding wear characteristics.

### UNIVERSAL JOINTS

Toyota Genuine Universal Joints are made from premium materials to fine tolerances, required to provide a perfect balance and long life.

[www.scantronic.com.pg](http://www.scantronic.com.pg) [www.toyota-outpacific.com](http://www.toyota-outpacific.com)

Ela Motors



**TOYOTA GENUINE PARTS**

**TOYOTA QUALITY SERVICE**

Ol Ripot bilong Namba 25 ELC/PNG Sinot long Wasu, Morobe provins wantaim Bustin Anzu

# Kigasung bai lukautim opis namba tri taim

Bustin Anzu i raitim

"LUTERAN mas sanap strong insait long kantri long wanem em i gat longpela histori long wok bilong developmen insait long kantri.


"Na tu wok bilong autim tok na ol stia toktok bilong sios tu em i strong olgeta. Lutheran misin i gat longpela histori wantaim kantri. Dispela sios i mekim na kamapim planti samting bilong kirapim kantri. Aninit long wok bilong autim tok na stia tok bilong sios i go long olgeta man meri bilong dispela graun. Olsem na mipela mas sanap strong long dispela mak na mekim wok." Het Bisop bilong Evanjelikel Lutheran Sios bilong Papua Niugini Reveren Dokta Wesley Kigasung i mekim dispela toktok bihain long 25 Silva Jubili long Wasu, Finschhafen, Morobe Provins.

Dokta Kigasung bai holim wok Het Bisop bilong ELC/PNG long namba tri taim (4-pela yias). Sinot i makim em long 1998 i kam inap nau.

Em i tok mipela bai wokabout wantaim aninit long lukaut bilong God long narapela taim gen olsem sios yet i makim. Em ino laik na tingting bilong em yet bai ronim dispela sios tasol wantaim sapot bilong ol Kristen bilip manmeri bilong dispela sios long prea bilong ol.

Ol narapela wan wok husat bai wok wantaim Dokta Kigasung em long taim Presiden bilong Hagen distrik Pasto Zau Rapa olsem namba tu bisop na Isaac Theo olsem sios Seketeri.

Dokta Kigasung i kisim sia bilong em bek taim Rapa i kisim wok long ekting namba tu bisop na presiden bilong Goroka distrik Pasto Ohuno Mambu. Theo



VOT TAIM: Bisop Kigasung i vot long taim bilong makim nupela bisop.

i kisim ples bilong Fua Singin, husat i wok sios seketeri long 8-pela yia i go pinis.

Pasto Rapa, husat i wok olsem presiden bilong Hagen distrik long 20-pela yias olsem em bai wok boi bilong sios na wok wantaim het bisop.

"Mi wanpela grasrut Pasto na mi wok long distrik bilong mi yet long ol dispela yias. Distrik bilong mi igat hevi tasol long bilip long wok bilong God mi ino wari long wanpela samting. Mi tok amamas long ol Kristen manmeri bilong dispela sios long givim mi tok orait long

kamap wok boi bilong yupela na kamap namba tu bisop," Pasto Rapa i tok.

Ol dispela senis bilong lusim opis na kisim opis bai kamap long Jun, 2006.

# Luteran Yunivesti bai kamap long 2007

Bustin Anzu i raitim

SILVA Jubili sinot bilong Evanjelikel Lutheran Sios bilong Papua Niu Gini i oraitim pinis Lutheran Yunivesiti mas stat long 2007. Tasol Nesanel Gavman mas givim tok orait na opis bilong Higher Edukesen mas putim olgeta pepa wok i go stret long kamapim dispela skul.

Namba 25 Silva Jubili Sinot long Wasu, insait long Finsafen, Morobe Provins i pasim pinis ol toktok we bung i bin wanbel long en bilong kamapim dispela Yunivesti bihain long prinsipel bilong Martin Luther Seminari Reveren Dokta Zirayukic Kemung i kamapim ripot bilong dispela Yunivesti.

Dispela ol ripot em i putim long sinot na tu tok aut long wanem ol samting i stap pinis, rot bilong kisim mani, wanem ol kos bai skul i putim i go aut na ol narapela samting bilong dispela Yunivesti.

Sinot i luksave tu olsem nau em taim bilong Lutheran sios mas gat Yunivesti bilong em yet. Long dispela as tingting ol i tok orait long dispela bikpela skul i mas stat long neks yia.

Sapos Nesanel Eksekutiv Kaunsel (NEC) i tok orait long dispela skul i stat

na opis bilong higher edukesen i stretim ol pepa, dispela Yunivesti bai ol i kolim yet long Asia Pasifik Lutheran Yunivesti (APLY).

As tingting em olsem ol narapela Lutheran sumatin long ol narapela kantri long Asia na Pasifik i mas kam skul na kisim save. Man husat i go pas long kamapim dispela nem Danny Gonol i tokim Wantok olsem bikpela tingting em long pulim ol narapela Lutheran long kam skul.

"Mi bin tingting olsem i moa beta long kolim dispela nem long wanem dispela bai opim rot bilong ol narapela sumatin insait long rijen long kam skul. Long dispela bai mipela skelim save na mekim olsem em wanpela skul bilong olgeta lain Lutheran na ino bilong Papua Niu Gini," Mista Gonol i tok. Dokta Kemung i tok ol narapela ogenaisesen i sambal tasol long givim han sapos gavman i oraitim dispela skul.

"Ol narapela Lutheran Yunivesti long Lutheran Ovasis Patna Sios (LOPC), Morobe Provinsel Gavman na ol narapela Lutheran saveman long wok i redi tasol long givim han.

Martin Luther Seminari (MLS), i stap long Ampo, long Lae bai senis i go long Asia Pasifik Lutheran Yunivesti.



MEKIM MUSIK LONG BIKPELA: Ol dispela yangpela bilong Musik Ministri i winim trampet long taim bilong sinot na selebresen

# Luteran bilip manmeri abrusim 1 milien

Bustin Anzu i raitim

TRINDE i bin makim amamas de i bilong Evanjelikel Lutheran Sios bilong Papua Niu Gini (ELC/PNG) na planti

samting i kamap.

Dispela de em bilong makim 50 yia anivesari long wok evanjelis insait long kantri na 25 silva Jubili. Planti degeet na ol Kristen man meri i kamap

long dispela bung.

Dispela ples tu em makim taim ol misinari i go long narapela hap ples wantaim Hailans na tele-mautim wok bilong God. I bin i gat 163, 000 bilip

man meri bilong sios long stat long namba wan sinot long 1956 na insait long las 50 yia, i gat moa long wan milien Lutheran insait long kantri. Bung i bin pinis long las Fraide.



# Yali i no moa memba

## ...tok klia long sindaun bilong Madang gavman

**MEMBA** bilong Raikos James Yali husat i stap long Beon Haus kalabus i no moa memba bilong Nesenel Palamen.

Dispela i bihainim wanpela tok klia i kam long Minista bilong Inta Gavman Rilesens Sir Peter Barter.

Wanpela tok klia i kam long opis bilong Sir Peter, i tok 'Yali i bin pinis olsem Memba bilong Palamen taim kot i sasim em long mekim pasin reip long namel long mun Disemba las yia. Em i ken kisim bek nem bilong em olsem MP sapos em i apil agensim dispela sas na win bipo long ol rit pepa bilong


wanpela bai ileksen i go aut. Tasol nau yet, em i no moa Memba bilong Palamen.'

Sir Peter i tok olgeta memba bilong Madang Provinzel Asembli i mas bihainim gut ol stretpela stia tok long ol arapela rot i stap long strongim bek gavman bilong Madang provins.

Long dispela as, Sir Peter i tok klia bai olgeta memba bilong Madang provinzel gavman i save long husat i ken kirapim wanpela kibung bilong provinzel asembli, ol rait bilong ol na ol stretpela rot bilong makim wanpela Gavana na Deputi Gavana bilong provins.



**YALI:** Lusim nem olsem Memba taim kot i salim em go kalabus.



**SIR PETER:** Planti kain tokkot i no stret i paulim tingting bilong ol memba bilong provinzel asembli.

### OL DISPELA TOK KLIA EM

\* Sampela stia i bin go long em na ol arapela lain long Madang long sindaun bilong em olsem memba bilong palamen i no bin stret. Ol etvaise i no bin klia long Konstitusenel Amenmen 24 Palamen i bin oraitim long taim bilong Morabuta Gavman. Dispela senis long lo i tok husat Memba bilong Palamen i kisim mekimsave bilong kot inap long go kalabus bai lusim nem olsem MP. Pasin reip em i asua we i gat kalabus mekim save.

\* Tok klia we Konstitusen i tok husat manmen i kisim mekimsave moa long 9-pela mun i mas lusim wok Memba em i tru. Dispela rausim bilong nem Memba i no inap kamap sapos i gat apil agensim konviksen o sas. Tasol dispela i no inap wok bilong Yali long wanem em i lusim nem Memba taim kot i salim em long go kalabus we em i bin lusim nem Memba.

\* Yali, taim em i lusim nem Memba bilong Palamen i bin lusim tu wok olsem Memba bilong Provinzel Asembli.

\* Tupela top lo atoriti insait long Papua Niugini, Sir Arnold Amet na Ektung Atoni Jenerel wantaim i wanbel olsem Yali i lusim pinis posisen olsem Gavana. I gat sampela paitim tokkot i stap sapos dispela i kamap pinis o bai i kamap taim Asembli i makim nupela Gavana.

\* Olgeta stia tok long lo i tok Yali i no inap wok olsem Gavana taim em i stap

kalabus long Beon Haus Kalabus. Bihainim tok bilong lo - em i no stap o i no inap sindaun long kibung.

\* Olgeta stia tok long lo i tok klia olsem Deputi Gavana i kisim wok lukaut bilong Gavana sapos Gavana i no stap o i no inap sindaun long kibung Gavana i nogat pawa long makim narapela manmen long kisim wok bilong em.

\* Provinzel Asembli nogat pawa long rausim Deputi Gavana o long makim ektung Deputi Gavana.

\* Olgeta kibung bilong provinzel asembli na Provinzel Eksekutiv Kaunsil em Deputi Gavana i mas go pas long em taim em i ektung gavana. Wanem provinzel asembli o PEC kibung we narapela i go pas long em i no bihainim tona i nogat strong.

\* Pawa bilong Deputi Gavana husat i sanap olsem Ektung Gavana karamapim makim na rausim bilong ol memba bilong Provinzel Eksekutiv Kaunsil.

\* I nogat mid long Provinzel Asembli long muvim wanpela vot bilong rausim Yali long opis bilong Gavana. Ol i mas votim nupela Gavana tasol bihainim wanpela mifing i gat slaman na inap Memba bilong Provinzel Asembli i stap.

\* Provinzel Asembli sapos em i sindaun gut na i gat slaman na i givim inap toksave na i gat inap memba i ken

rausim Deputi Provinzel Gavana na yusim simple majority long votim nupela Deputi Gavana.

Sir Peter i tok planti memba bilong Madang Provinzel Asembli i wok long abrusim ol stretpela stia tok long lo Dispela basim em i tok i wok long paulim tingting bilong olgeta arapela lain insait long gavman na i nogat moa gutpela stia i stap.

Em i givim tu sampela stia long wanem samting i mas kamap nau.

\* Deputi Gavana olsem Ektung Gavana i mas sindaun na sindaun wanpela kibung bilong Madang Provinzel Asembli.

\* Ol memba bilong Provinzel Asembli i mas kamap long dispela kibung na givim namba.

\* Ol memba i mas votim nupela Sapa Bil bilong lukautim Madang Gavman na eministresan na inap nupela bilong tripela mun i kam.

\* Ol memba i mas skelim sapos em i taim bilong votim nupela gavana na.

\* Ol memba i mas tingim sanap bilong Deputi Gavana long bihainim taim.

Sir Peter i singaut long olgeta provinzel asembli memba long kamap long dispela kibung long dispela Eralde long tok oraitim Sapa Bil bai i gat inap moni bilong provins long tripela mun i kam.



WAN na hap wik tasol i stap nau bipo long skul yia bilong 2006 i kirap bek gen. Em nau. Taim bilong ol papamama long hetpen long ol samting olsem skul fi, buk, pensil, na olgeta arapela samting bilong ol pikinini long statim skul.

NAU em i gutpela taim bilong ol papamama long sindaunim ol pikinini bilong ol na stretim gut tingting bilong ol bai ol i lukluk moa na tingting strong long skul long dispela yia na noken bisi long ol samting i ken paulim tingting olsem dring bia, pilai hos res masin o kas na bihainim ol man nogut long strit.

BIKPELA singaut i go aut pinis long ol tisa bilong kamap long skul kwik taim bai ol sumatin i ken statim gut skul yia bilong ol. Ol papamama i mas tingting strong long baim ol skul fi bilong ol tu. Sapos nogat, bai ol pikinini i no inap pinisim gut skul long dispela yia.

WANPELA bikpela Wantok Niuspepa man bilong long taim bipo i kam raun na stori wantaim mipela long opis long Mosbi. Em i givim liklik tu toea tingting bilong em long dispela ECP program bilong ol Australia polis. Tingting bilong em i olsem: "Sapos gavman bin tingting gut na salim tupela long dispela 200 Australia polisman i go insait long wan wan sab distrik insait long ol bus ples, ating bai yumi orait nau. Taim Australia polis i go long wanpela liklik sabdistrik, nupela polis stesen bai sanap, nupela helt senta bai go insait, nupela benk sevis bai bihainim ol na olgeta arapela samting Australia gavman bai givim ol. Em nau, kantri bai develop long olgeta hap kona." Yu ting wanem?

# PNG mas kamapim moa as ples niuspepa

James Kila i raitim na kirapim dispela, em i tok.

OPOISEN Lida Peter O'Neill i tok Papua Niugini i mas i gat moa midia bisnis em ol yet i papa long en.

Mista O'Neill i mekim dispela toktok long Mande dispela wik long Loloata Ailan Risot taimem i bin opim bung bilong ol nius manmeri we PNG Midia Kaunsil i bin kamapim.

Mista O'Neill i tokaut olsem PNG nau yet i gat ol niuspepa em ol ovasis lain i papa long en. Dispela em tupela niuspepa i save kamaut olgeta de bilong wok em Post Courier na The National.

"Yumi noken larim ol ovasis lain yet i kontrolim midia industri long PNG. Yumi gat planti gutpela kwolati manmeri husat i gat gutpela save long wok bilong midia industri i stap husat i ken go pas

long dispela wokso. Mista O'Neill i tok olsem long kantri olsem Australia, 15 pesen tasol em midia ol ovasis lain i bosim. Tasol long PNG ol ovasis lain i bosim bikpela sea mak olsem 100 pesen. Mista O'Neill i bin bekim ol askim bilong ol niusmanmeri na tok olsem laik bilong em long politiks i bin kamap long 1997 taim Leit Sir William Skate i kirapim bel bilong em. Em i tok olsem em i sore tru long Sir William, husat i bin wanpela gutpela poroman bilong em. Nau yet 16-pela niusmanmeri i stap long dispela wokso long Loloata Ailan. Wanpela ripota bilong wansolwara long Solomon Ailan, Robert Iroga tu i stap long dispela wokso.

# Polis bai strong long painim ol stilman - Inguba

POLIS insait long kantri bai lukluk strong moa long holim ol stilman insait long gavman.

Dispela em toktok i kam long Polis Komisina Sam Inguba.

Mista Inguba i tokaut dispela wik olsem polis i wok long strongim wok painim bilong ol i go insait long ol gavman dipatmen we ol stilman i wok long hait na kisim moni long en.

Em i tok husat man polis i holim bai kisim bikpela mekimsave long stil pasin bilong ol.

Komisina Inguba i bin kisim wanpela ripot long ol polis ditektiv husat i wok long glasim Nesenel Plening na Monitoring Frot kes we K1.2 milien em ol stilman i bin paulim.

Samting olsem 8-pela man i holim ol bikpela wok insait long pablik na praivet sekta i kisim pinis sas bilong wok bung long stilim moni na seven long wanpela ten faiv kar we ol i bin baim wantaim stil moni em polis i kisim bek pinis.

"Dispela kes i soim klia olsem korapsen i stap, maski mipela i wok strong long daunim na i stap long han bilong ol gutpela manmeri bilong PNG long daunim dispela kain pasin na kotim ol stilman i go long polis.

"Korapsen i save bagarapim ikonomi na komyuniti bilip bilong kantri na yumi olgeta i mas sanap na rausim dispela hevi," Komisina Inguba i tok.

# Ges paipain kisim gutpela nius

BIKPELA ges paipain projek bilong kantri we bai i pulim ges i go daun olgeta long Australia em ol i pasim pinis toktok na tingting long longpela taim i kisim i kisim gutpela nius taim wanpela Australia kampani i baim ten pesen bilong ol sea insait long dispela projek.

Ripot i tok Australian Ges Lait (AGL) kampani i peim klostu 530 milien dola i go long kampani Oil Search long kisim dispela 10 pesen sea insait long projek.

Dispela projek i no bin mekim bikpela wokabaut bihain long ol i bin kamap wantaim tingting long mekim klostu tenpela kribmas i lus pinis.

Dispela tok wanbel nau bai lukim AGL i kamap namba wan bikpela kastoma i go insait long wanpela salim na baim agri-men wantaim ol PNG ges produsa, maski projek i wetim yet bikpela tok orait long kam long ol join patna bilong ol.

Dispela tri bilien dola paipain bai karim ges long ol ges ples long Sauten Hailans bihainim wanpela 3000 kilomita paipain i go olgeta long maket long Australia.

Ol i ting ol bai i gat wanpela Projek Senksen bung long pinis long dispela yia long makim rot bilong kamapim wok na karim projek i go het. - Radio Australia.

# 5 yia plen bilong Bogenvil

Andrew Molen i raitim

**PRESIDEN** bilong Otonomes Rijen bilong Bogenvil (ARB), Joseph Kabui i tok rot mep bilong kamapim divelopmen long hap i redi pinis na wok bai i go het nau.

Namba wan 6-pela mun bilong Otonomes Bogenvil Gavman (ABG) i ron gut tasol bihain long ileksen bilong ol na Presiden Kabui i tok ol gutpela samting i kamap gut long dispela taim i soim olsem taim i kam bihain bai orait tasol.

Em i tok wanpela samting ol i mekim long taim bilong ileksen we i lukim ol samting i kamap gut em olgeta politikel pati i kam bung wantaim long kamapim wanpela gavman tasol long lukautim rijen.

"Ileksen i givim tok orait long wan wan pati i traim ileksen tasol olgeta pati i lusim pasin bilong wan wan pati i wok em yet na olgeta i kam bung wantaim long kamapim wanpela kolisen gavman tasol wantaim as tingting long strongim pasin wokbung o yuniti long Bogenvil," Mista Kabui i



**PLEN I REDI:** ABG Presiden Joseph Kabui wantaim wanpela delegesen i makim ABG i bin stap long Mosbi long wik i go pinis i stori wantaim Bogenvil loya man Tony Luwong na lukluk long 5-yia plen bilong rijen.

tok. "Mi amamas long dispela tingting mipela i bihainim na Bogenvil i lukim planti gutpela kaikai bilong dispela pinis."

Em i tok wanpela bikpela samting ol i kisim em tingting bilong ol long kamapim wanpela rot mep o plen

bilong ol long bihainim long 5-pela yia i kam.

Dispela ol i kolim "Strategic Action Plan" o stretisik eksen plen.

"PNG gavman na planti narapela gavman i save toktok long Midium Tem Divelopmen Stratesi, mipela i bin tingim long

kamapim wanpela bilong Bogenvil tasol bihain mipela i senisim gen na kamapim dispela stretisik eksen plen.

"Dispela stretisik eksen plen em i olsem midium tem divelopmen stretesi bilong mipela," Presiden Kabui i tok.

"Insait long dispela stretisik eksen plen bilong ABG mipela i kisim Milenium divelopmen gol bilong Yunitet Nesen (UN) na midium tem divelopmen stretesi bilong nesenel gavman na bungim wantaim long kamapim wanpela stretesi we mipela i bilip bai i gat planti samting i kamap long mekim em i wok."

Em i tok ol i kamapim dispela plen we bai i ken kisim divelopmen i go long olgeta hap na level bilong Bogenvil.

"Dispela plen i ken soim tru ol pipel bilong Bogenvil na kisim divelopmen i go daun tru long ol pipel long olgeta hap long Bogenvil i go daun long wanpela liklik ples o viles tu," Mista Kabui i tok.

"Mi amamas tu bilong wanem taim mipela i kisim dispela plen i kam las yia long soim long gavman, em i winim bikpela amamas bilong gavman na UN tu i amamas tru long en," Kabui i tok.

UN long nau tu i laik kamapim wanpela rot so long bungim moni long helpim ol projek long

Bogenvil i go het.

"UN nau i laik kamapim dispela rot so long bungim moni long kamapim ol projek long Bogenvil long dispela yia i go inap long 2010.

"Dispela rot so bai kamap sampela taim long dispela yia, em i ken kamap neks mun o long Mas nabaut," Mista Kabui i tok.

Em i tok UN nau i laik kamapim strongpela wok insait long Bogenvil na ol i gat as long mekim dispela.

Wanpela bilong ol dispela as em, long olgeta wok bilong kamapim bel isi na isipela sindaun long olgeta ples long wol we i gat pait, UN i putim liklik moni long olgeta wok long Bogenvil tasol nau stori long wok bilong Bogenvil i kamap na i winim olgeta narapela husat i bin bungim wankain hevi.

"Nau ol i laik bihainim toktok bilong ol olsem wok bilong kamapim bel isi long Bogenvil i winim ol narapela ples na bungim wankain hevi na kamapim sampela samting long helpim divelopmen bilong provins," Mista Kabui i tok.

## Planti skul i gat skul fi dinau

Noreen Dada i raitim

SKUL atoriti long Nesenel Kepitel Distrik i singaut long ol sumatin na papamama long baim ol skul fi bilong ol i stap yet long las yia na ol yia i go pinis.

2006 skul yia bai stat long tupela wik i kam na dispela em long Januari 30 tasol i gat planti sumatin husat i no pinis long baim skul fi bilong ol long 2005. Singaut ilong ol het tisa na ol ekting het prinsipel long ol skul long NCD i go long ol dispela sumatin long baim skul fi kwik taim.

Planti skul insait long NCD i autim wan kain singaut long ol sumatin husat bai go het wantaim Gred 8,10 na 11 bilong ol long 2006 na i no baim skul fi i mas baim bipo ol i rijista. Ol sumatin husat i pinisim Gred 8, 10 na 12 long 2005 na i no baim skul fi, bai ol skul i holim setifiket bilong ol inap ol i baim dinau bilong ol.

Wanpela long dispela kain skul i Badihagwa Hai Skul, we ol sumatin i no peim yet skul long mak bilong K186,496.

"Ol Gred 10 sumatin bilong mipela i no peim yet K106,496 long 2005 skul yia. Ol sumatin husat i no baim olgeta skul fi bilong ol bai i no inap kisim setifiket bilong ol inap ol baim skul fi. Ol Gred 9 sumatin i gat K86,000 ol i no baim yet na bipo ol sumatin i ken rijista, ol i mas baim K350.00 pas-taim wantaim wanem dinau ol i gat," Ekting Prinsipel Mista Kahueu i tok. Gerehu Sekonderi Skul Ekting Prinsipel Lembias Magasu i tok ol i bin tokaut long ol sumatin olsem ol i mas baim olgeta skul fi namel long taim bipo 2005 skul yia i pinis na bipo 2006 skul yia i stat.

"Bikpela tingting i long olgeta sumatin long baim skul fi bipo ol i ken go het wantaim 2006 skul yia na long ol gred 10 na 12 sumatin long kisim setifiket bilong ol. Long dispela yia mipela bai daunim skul fi. Ol Gred 9 na 10 bai baim K630 we long 2005 ol sumatin i bin baim K820. Ol Gred 11 na 12 bai baim K1090-K110 mipela i daunim," Mista Magasu i tok.

Planti skul etministresen i kisim dispela eksen long holim ol setifiket long mekim ol mamapapa i save olsem edukesen, olsem ol narapela sevis i no sevis we yumi ken kisim nating - yumi mas baim.

Ramu Sugar bai salim planti pikinini i go bek long skul

**RAMU SUGAR**

**back to school FEES**

**K100,000**

**bilong ol skul fi long winim**

Baim paket Ramu Sugar long stap insait long dispela resis.

Raitim bekim long entri fom na pasim wantaim wanpela paket i nogat suga long en long soim olsem yu bin baim.

Salim entri bilong yu i kam long Ramu Sugar Back To School Promotion C/- Locked Bag Service Lae, Morobe Province, o putim insait long entri bokis i stap insait long wan wan ol stua.

Dro o taim bilong painim ol wina bai kamap long Fraide long olgeta wik stat long namba 27 de bilong mun Januari na bai pinis long namba 24 de bilong mun Februari.

**Ramu Sugar back to school promotion**

Name:.....

Address:.....

Phone:.....

**POST TO:**  
**Ramu Sugar Back to School Promotion.**  
**C/-Locked Bag Services Lae,**  
**Morobe Province**  
**Papua New Guinea**

**Bai i gat 40 manmeri i ken winim K500 wan wan wik inap long 5-pela wik olgeta**

Dispela resis bai pinis wantaim las entri o pas ol i kisim long namba 24 de bilong mun Februari

# Panguna rot i nogut tru

## ...em i ken kamapim birua

Aloysius Laukai  
i raitim

ROT namel long Jaba Pam Stesen na klostu long boda bilong Nagovis na Panguna i kamap nogut.

Rot i go nogut tru taim Bogenvil Kopa Limited (BCL) i bin stopim wok bilong ol long 1990 bihain long ol hevi na bagarap leit Francis Ona i kamapim long No-Go-Zon.

Graun i bruk bihainim bikipela ren i mekim hat na givim bikipela hevi long ol pipel husat i save go kam long dispela rot.

Em ol pipel long Siwai na Nagovis long Saut Bogenvil eria husat i save yusim dispela rot planti taim bikos em i sot kat rot long i go na i kam long Arawa na Buka.

Sampela taim i go pinis long 2005, Wantok i bin ripotim dispela wari we long dispela taim, i gat wanpela hap rot we i kamapim bikipela wari. Long nau taim, i gat 4-pela arapela hap we i kamap nogut bikos long ol graun i bruk we planti ren i kamapim.

I gat toktok olsem Mekamui i tok orait long ol wok mentenens i kamap long dispela rot tasol dispela i ken kisim sampela mun o wanpela yia long wokim.

Olgeta moning, samting olsem 30 ka i save i go na i kam long dispela rot.

# Bogenvil ileksen i ron gut

VOT long Bogenvil Rijinel bai ileksen i wok long go gut maski long ol liklik meknais.

Na taim bilong vot bai pinis long dispela Sarere Janueri 21 na kaunim long neks wik Mande Janueri 23.

Ripot i kam long Buka i tok vot long planti hap bilong Bogenvil i pinis tasol i no yet long Siwai long Saut Bogenvil na Nissan Allan long Atols rijen.

Mak long ol manmeri i vot long dispela bai ileksen bai i stap daunbilo bikos planti pipel i no vot.

Samting olsem 123,000 long moa long 160,000 populesen long Bogenvil inap long vot.

Ripot i tok as long planti pipel long i no vot em, Me'ekamui na U-Vistral lain i stopim planti pipel long saut Bogenvil olsem long Siwai na Buin, Sentrel Bogenvil na Buka long noken vot. Sampela em nem bilong ol i no stap long Komon Rol na sampela i les long vot bikos ol i tok watpo ol bai hatwok long vot na taim ol dispela lain i kamap lida, ol i no save helpim pipel bilong ol tasol ol i strong long pulumapim poket bilong ol.

Ripot i tok ol lain Mek'ekamui long Konnou Konstituensi long Buin i bin kisim tripela balot bokis long rotblok klostu long Tabago tasol ol i givim bek wanpela pinis. Maski dispela i kamap, ol poling opisa i bin skruim yet wok bilong vot i go.

Ripot i tok ol dispela lain i kros na kisim ol balot bokis bikos ol laikim Iektorel Komisn long peim K15,000 bipo ol i karimaut vot long konstituensi bilong ol.

Ripot i tok ol lain long Wakunai i bin holim wanpela balot bokis tu bikos ol i laik stap insait long ol wok bilong ileksen olsem karimaut vot na kaunim.

Ripot i tok tu olsem Pos Kuria niuspepa ripot long Simon Pentanu em olpela bikman long Ombutsmen Komisn i no bin vot em i no tru.

"Mista Pentanu i bin putim vot bilong em long Arawa long las Trinde Janueri 11. Nem bilong em i bin stap long Saplementeri Rol," ripot i tok.



BAGARAP TRU! Wanpela long ol hap rot long Panguna we i bagarap tru na i ken kamapim birua.

# Strongim famili na komyuniti

Aloysius Laukai i raitim

STRONGIM komyuniti, famili na kalsa long Bogenvil em samting we Otonomes Gavman i sapotim tru na i mas kamap na em i laik lukim long olgeta hap bilong Bogenvil.

Na gutpela wok bung i mas stap namel long sios na gavman na i no resis pasin.

Otonomes Bogenvil Gavman (ABG) Presiden Joseph Kabui i bin tok olsem long opim wanpela semina long ples Novah long Tonsu eria insait long Buka Allan.

Semina i tukluk long famili na yut insait long komyuniti.

Het tok bilong semina em "Strongim wok bilong famili insait long ol komyuniti" em wanpela Maris Bruder, Julian Hakumin husat i kam long ples Novah.

Dispela semina em i bihainim ol arapela we ol i karimaut stat yet long yia 1993 long Novah na manmeri krismas bilong ol i namel long 15 na 60 bilong Tonsu eria i save sindaun long en. Samting olsem 50 pipel i sindaun long nau semina.

Em i tok sapos planti pipel long Bogenvil i kisim ol dispela kain skul na wanem samting ol i mas mekim long ol wan wan komyuniti bilong ol, Bogenvil bai gutpela ples moa.

**COURTS**

X

# SELL

Win up to **K1,000**  
SCHOOL FEE  
**SURPRIZE!**  
...for your child. in 2006

OL FANTASTIK OILS NA SEIVINS LONG OL KALU OL NATIWI TAIM TAIM

Long olgeta droa bai igat NIU Praiz long...

- K60,000.00
- K55,000.00
- K45,000.00
- K40,000.00
- K30,000.00
- K25,000.00
- K20,000.00
- K15,000.00
- K10,000.00
- K 5,000.00

SEIVIM K100

K28 Long Fotnait

K799 ~~K699~~

DIPOSIT K1.00 Tasol

AKITA EN21-83N #103794  
**21" KALA TV**

- saun sistem: BK,DK1 • geim entateinmen
- 255 posisenol sistem • rimot kontrol

Bipo Kes K295

SEIVIM K50

K23 Long Fotnait

K639 ~~K549~~

DIPOSIT K1.00 Tasol

Zaiko  
**ZAIKO TV-Z1404GAV #101797**  
**14" KALA TV**

- 256 Sonols • Multi-sistem • NTSC Palai bek
- RCA Input/Output • Planti moa tok peles OSD
- oto-Voltes 110-240V, 50/60Hz

Bipo Kes K595

SEIVIM K30

K10 Long Fotnait

K228 ~~K188~~

DIPOSIT K1.00 Tasol

SANYO  
**SANYO BIG300K #224794**  
**Isi-Long-Karim Pawa CD/Kaset Redio**

- 6SWats/Pawa P.M.P.O.
- BeisXpanda • AC/DC
- Inap kisim CD/Lain-in
- FM/MW/SW1/SW2

Bipo Kes K225

**BAIM NAU**  
SEIVIM NAU

**Ready**  
100% KAS PAKU  
100% KITA PLAN

**The Courts Price**  
THE LOWEST PRICE ANYWHERE!

COURTS

Edim valu Olgeta dell

PORT MORESBY - OP 7 PELA DEI ☎ 302 5800 or kam long Spring Garden Rot, Gordons / LAE: OP MON-SAT ☎ 472 4800 or kam long Milfordhaven Rot, Lae, Morobe Province.

TOKSAVE: Courta Retail Faleveta i new long ya optat kam i kam m'pela long kiam moa tokave. Courta K1.00 DIPOSIT long tu bilong ya kam kiam m'pela long kiam moa tokave long dispela LAE: Dispata bilong PNG. \*Pris i tople i m'pela long ol kaga long dispela admetimen inap long sere kiam kiam na bai moa tokave long dispela sere. M'pela long taim long 2006 em ol asua kamap long ol "Kasapa" novetimen. Ol kaga bilong stap long kiam m'pela kiam dispela admetimen. Wanwan kaga bilong stap long kiam m'pela kiam. I-dell bilong Pris - 21/01/06

# Maprik distrik kisim helpim

## ...Amamas long Kapris

HELT na Edukesen sekta long Maprik Distrik insait long Is Sepik provins i kisim bikpela helpim olsem Krismas presen i kam long memba bilong ol na Woks Minista Gabriel Kapris taim em bin prisentim 4-pela ka long tupela servis eria long Krismas na Nu Ya taim.

Foapela nupela ka we tupela i bin go long helt na narapela tupela long edukesen sekta long Maprik Distrik em ol i baim wantaim mani inap long K400,000 bai helpim tru wok bilong ol helt senta we Minista i givim ol ka long em. Moa yet long sait bilong wok etministresen na karimaut ol wok imejensi.

Albinama Sab helt senta i bin kisim Toyota lenkrusa taim lalahita na Ulupu helt sab-senta i bin laki long kisim tupela Toyota Hailaks. Nupela skul em Brugam Hai skul i kisim Daihatsu Daina trak taim Roma Viles pipel i bin kisim K100,000 long sanapim wanpela etpos.

Ol pipel long dispela 4-pela viles i bin amamas tru taim pikinini na lida bilong ol i givim ol dispela 4-pela ka we bai helpim long kisim helt na edukesen semis i go long ol.

Olsem na taim em i go long

ol dispela wan wan ples, ol bin givim em na lain bilong em bikpela welkam.

Minista Kapris em namba wan yangpela man husat i autim lapun papa Sir Peter Lus husat i bin stap memba bilong Maprik long 38 yias long 2002 nesenele ileksen.

Win bilong em ino bin kamapim bikpela meknais tasol opim dua

long nupela de bilong hop long ol Maprik pipel.

Long taim em i givim ka long lalahita helt sab senta, em i wokim dispela toktok:

"Maprik yupela ol gutpela pipel. Yupela i no save senisim lida klostu klostu. Givim mi 38 years olsem yupela i bin givim long Sir Peter Lus na yumi lukim wanem samting bai kamap long distrik bilong yumi," Mista Kapris i bin tok.

"Ol senis i no save kamap hariap. Lida tasol wantaim eksperiens na na save i ken wokim olsem," Minista Kapris i bin tok

Em i tok ol dispela nupela developmen i bihainim Midium tem Developmen Plen (MTDP)we i gat tu long em, Distrik semis Developmen Progem.

"Mi no bilip long ol wan wan politisen i pufumapim trausis poket bilong em. Bai mi pamim mani i go long ol pablik servis eria we olgeta pipel basi yusim na kisim gutpela helpim long em", Minista Kapris i tok.

Em bin givim tromoim moa long K500,000 i go long Maprik Distrik long Krismas na Nu ya taim i go lukluk raun long ilektoret bilong em.

Dispela mani i kam long Nesenele gavman na ol arapela ausait helpim. Maski lukluk raun bilong em i opisel, famili bilong em i bin go wantaim em long ol wokabaut bilong em.

Long sait bilong developmen, Maprik Distrik i no bin lukim developmen insait long las 40 yias.

Ol pipel i bin save otsem i nogat taim bilong politiks.

"Mi wanpela man nating long ples na mi no save wanem samting em developmen inap Kapris i kamap memba bilong mipela. Mi amamas tru. Em trupela lida." Wanpela plesman i bin tok moa olsem taim Mista Kapris i kamap lida, em i givim nupela mining long wod,"developmen."



RAIT MAPRIK PIKININI: Ol pipel i amamas karim Minista Gabriel Kapris i go long seremoni bilong givim ol ka long ol helt senta na ol skul long Maprik Distrik



OL NUPELA KA: Ol ka ya bai helpim tru ol haus sik lain na ol skul long sevim ol sik pipel :

## Maprik bai gat vanilla fektori

WOK long sanapim Vanilla bisnis long Maprik taun insait long Is Sepik bai stat long dispela yia.

Kos long sanapim fektori inap long K5 milien mak.

Dispela em namba wan kain fektori olsem bai kamap long PNG.

Wanpela long ol biknem stoa kampani we i gat han long sampela provins long PNG em Papindo Limitit i patna wantaim gavman long sanapim dispela vanilla fektori long Maprik.

Woks Minista na memba bilong Maprik Minista Gabriel Kapris i askim strong ol pipel long lukautim kampani (Papindo) na em i ken go het long sapatim dispela fektori.


Papindo i no stap longpela taim long Is Sepik tasol em i wok long givim bikpela helpim long provins, moa yet long Maprik. Pastaim kampani i kam insait, ol pipel i no bin lukluk gut long em tasol nau ol i luksave long em.

Minista Kapris i mekim klia long pipel olsem Papindo em i wanpela

praivet bisnis na em i nogat sea wantaim ol.

"Em i narakain long "patna long developmen" na bisnis patna. Wokpren we yumi lukim em "pablik na praivet patnasip long wok developmen," Minista kapris i tok.

Em i tok gavman i nogat inap mani long karimaut ol wok developmen na olsem, dispela kain wok pren bai helpim



GUT NIUS BILONG VANILLA GROAS: Kain vanilla olsem nau bai yu no inap salim in go long ovasis long kisim moni. Nau fektori bai kamap long Maprik stret.

kamapim na strongim ol wok developmen long distrik.

Papindo i opim supamakot na Dipatmen stoa long distrik i sotim wok-abaut na tuhat long ol pipel in go long Wewak taun long wokim soping bilong ol. Ol i sevim mani tu long baim Trenspot. Em i daunim tu hevi long ol raskol i karimaut ol holap long rot.

## Is Simbu kisim distrik

### Bustin Anzu i raitim

IS Simbu insait long Simbu Provins i kisim distrik olsem na dispela i skruim namba bilong ol distrik i go antap long 17.

Long namba 25 Silva Jubili sinot long Wasu, insait long Finschhafen, Morobe Provins, sinot i tok orait long ol i ken kamapim Luteran Sios distrik bilong ol yet.

Pastaim ol i save kam aninit long Simbu distrik tasol taim ol i bruk, Simbu nau i gat tupela distrik insait long provins.

Dispela tingting bilong ol long kamapim wanpela distrik bilong ol yet i stat long 2000, namba 22 sinot long Jiwaka distrik, we i bin kamap long Banz, insait long Westen Hailans Provins.

Long dispela sinot ol i toksave long hait tingting bilong ol long kamapim wanpela distrik.

Long 23 sinot long 2002, we kamap long Mumeng distrik long ples Wau, insait long Morobe Provins. Sinod i givim tok orait long ol i ken kisim interim distrik. Dispela taim ol i makim Barne Yoba olsem wanpela interim Siaman bilong Is Simbu.

Long namba 24 sinot we Kainantu distrik i lukautim na kamap long Aiyura long 2004, sinot i givim ol kondisen i stia long bihainim.

Sampela long ol em olsem ol i mas stretim pepa wok (wantaim bounderi), ol i mas holim distrik konferens, mas i gat ol Eksekutiv bilong distrik, raitim ripot i go long sios kaunsel, sios kaunsel i mas lukim dispela ripot na mas salim opisel deleget bilong ol i go long sinot.

Is Simbu i inapim olgeta dispela stia ol i bin tok long en na long Silva Jubili Sinot, sinot i oraitim ol long kamap wanpela distrik bilong ol yet.

Nupela distrik presiden bilong Is Simbu Pasto Mioapa Siune i no inap holim aiwara bilong em bihain long sinot i givim ol tok orait long kamap wanpela distrik bilong Ewanjelikal Luteran Sios bilong Papua Niu Gini.

"Hat wok bilong mipela i karim kaikai nau. Mipela i bin wet longpela taim long kisim dispela samting. Nau bai mipela bel isi long wokim wok i go het yet," Pasto Siune i mekim dispela toktok bihain tasol long sinod i tok yesa olsem Is Simbu em distrik bilong em yet.

Mama Distrik husat i save lukautim ol Simbu distrik pastaim i tok ol i gat planti wok long mekim long dispela nupela distrik.

Distrik Presiden Pasto Daryl Boyd i tok: "Mipela i wanbel long Is Simbu i kamap distrik. Tasol ol igat bikpela wok istap.

Dispela wok bilong lukautim na ronim dis-

trik i hatpela na hevi pela wok olsem na ol i gat planti wok long mekim."

Bounderi bilong ol em stat long Daulo pass, katim i go long Elimbari maunten na kalap igo daun long wara Whagi na go kamap long Ganige, saitim long Kundiawa taun, kalap igo long Sina sina na go bek long Daulo Pass. Dispela i luk olsem ol i bihainim wok misin eria bilong ol.

Ol nupela tidaman bilong Is Simbu em Siune Presiden, Pasto Kennedy Gunua, namba tu presiden, Barne Yoba olsem sekretari na Sine Kepane kisim wok olsem tresera. Ol narapela lain em Naru Meven bai lukautim ol meri, Bal Gol bai lukautim ol lens na propeti na Pasto Gigmai olsem Gutnius Dairekta na Joe Bal olsem yut Kodineta.

# Woksop givim save long rait na stretim hevi



LAIKIM KAIN WOKSOP: Ol lain i sindaun long woksop i kisim gutpela save.

Timon Henry i raitim

WANPELA wik woksop long Mendi i bin givim ol lain i sindaun long em gutpela save long ol rait bilong ol na tu, rot long stretim hevi insait long famili, ples na komyuniti.

Famili na Seksuel Vailens Kos i bin stat Januari 9 na pinis long de namba 13 bilong dispela Mun i bin kamap long Mendi Katolik Daiosis Pastrol Senta long Kumin.

Famili na Seksuel Vailens Woksop i bin kamap long hat wok bilong Konsaletiv Implementesen na Monitering Kaunsel em wanpela Non Gavman Ogenaisesen (NGO) we i bin fandim dispela woksop bilong las yia na long dispela yia.

Planti manmeri we famili bilong ol i no sindaun gut i bin kam long dispela woksop. Na ol bin autim tok amamas long kam long woksop na kisim save we bai helpim ol i stretim ol hevi insait long ol famili.

Mista Rex Ero i tok em i gat bikpela amamas tru olsem ol lain CIMC i bin tok orait long kam insait long Sauten Hailans provins na bikos dispela skul i givim klia gut tingting long ol pipel na tu em i tok ol pipel i mas save long ol rait bilong ol.

34 manmeri bilong wan wan distrik i bin kam long stap long dispela woksop. Planti lain i sindaun long woksop i bin tok i gat planti vailens bilong famili na tu ol sumatin long dispela taim. Ino gutpela long ol i save pasim ol rait bilong ol pikinini na moa yet, long ol man na meri i no klia long ol rait bilong ol.

Wanpela bikpela askim ol lain i bin stap insait long woksop i bin askim em long ol politisen insait long provins na kantri long go bek sindaun wantaim ol pipel bilong ol na ol i ken go bek long ol ilektoret na provins

bilong ol na stap wantaim ol pipel na harim, lukim na helpim stretim ol wari na hevi bilong ol. Na tu, givim semis na developmen long ol.

Ol i tok Nesinol Gavman i givim gut baset long kirapim ol wok developmen tasol ol lida em ol namba wan man o meri long bagarapim ol rait bilong ol pipel. Makim maus bilong olgeta meri insait long dispela woksop na tu bilong Sauten Hailans Provins, Emma Jiara bilong Kaupena Sub Distrik i bin autim bikpela tok tenkyu i go long maus man bilong Katolik Daiosis bilong Mendi, Bisop Stephen Reichert opim dua bilong ol long kisim ol kain kain skul long developim bel na tingting bilong ol.

"Insait long dispela wan wik kos, mipela i lainim planti samting na em i helpim ol meri long sanap strong long daunim ol kain hevi i save kamap long famili bilong mipela. Bipo mipela ol meri i no save long ol rait bilong mipela na nau mipela i save pinis tok tru long wanwan rural komyuniti i stap long en na gutpela long givim moa skul na aweanes long ol bai ol tu i ken klia long wanem kain senis i wok long kamap long kantri bilong yumi, Mis Jiara i tok.

Maus man bilong Katolik Daiosis bilong Mendi," Bisop Stephen Reichert i tok lo bilong kantri i givim yumi olgeta rait na fridom long mekim ol kain wok insait long kantri bilong yumi o lo i no tambuim fridom bilong ol manmeri. Bisop Stephen Reichert tupela manmeri i wankain tasol long sait bilong bodi na spirit tu

Siaman bilong CIMC insait long provins, Nicholas Sambu i tok em moa gutpela sapos ol wanwan NGO i stap insait long SHP i ken kam bung wantaim na kirapim wok wantaim long bringim sevis i go insait long ples na komyuniti.

# Strongpela polis was long Hailans Haiwe

BAI i gat strongpela was long Barola na Komperi Veli we ol raskol i save wokim ol holap na stil pasin long ol ka i ron long dispela hap rot.

Ol atoriti long Isten Hailans provins i wokim dispela long stopim ol trabel na stil pasin i save kamap long Barola na Komperi Veli namel long Kainantu na Goroka insait long Isten Hailans provins.

Isten Hailans Lo na Jastis Sekta i wok wantaim Provinsel Polis Komanda long Isten Hailans Philip Solala na Provinsel Gavman we Gavana Mal Smith Kela na Deputi gavana Joksy Nakime i wok patna insait long dispela wok long mekim hap rot na ples i gutpela na seif long ol pasindia i yusim Hailans haiwe.

Long planti yia nau, Barola Veli i karim nem nogut olsem hap ples we ol raskol i save wokim holap long ol ka na bas na wokim stil pasin. Ol i save bagarapim planti meri na mama long dispela hap tu. Olsem na long las yia, ol mama i bin wokim wanpela mas i go long ol polis na nesanel na provinsel atoriti long mekim samting bilong stopim raskol hevi long Barola veli na ol arapela trabel eria moa long provins.

Long Krismas, gutpela presen i kamap bikos ol i wokim liklik patrol stesen bilong ol polis long wanpela hap rot long veli long polis na ol loman long putim strongpela was long ol raskol. Na ol i givim pinis tu wanpela ka long ol polis i karimaut ol wok.

Isten Hailans PPC Solala i tok dispela em i stat tasol long traim klairim ples long ol raskol na pablik na ol mama i ron long haiwe i ken raun wantaim nogat pret-



POLIS PATROL BEIS: Ol polis i strongim was long Barola Veli.

pasin na amamas long raun long ol. Siaman bilong Kainantu Lo na Oda Jastis Sektorel Apros Sobu Igao i bilip olsem em i taim nau long kamapim sampela senis.

"Dispela em i bikpela (important) haiwe. Yumi mas lukautim ol pipel i raun long dispela haiwe. Yumi lukim pinis ol vailens, dai na meknais i kamap long dispela hap haiwe rot. Em i taim nau long wokim samting," Mista Igao i tok.

PPC Solala i tok ol man meri i laikim gutpela sindaun na ol i les pinis long pasin ol raskol i wokim. Na em i taim nau long eksen, Mista Solala husat i wok long tok-tok wantaim ol papagraun i laik stretim dispela samting i tok.

"Lukim, nogat man i gat rait long mekim nabaut na kamapim hevi long ol pasindia. Ol i gat rait long yusim haiwe wantaim nogat pret pasin. Bai yumi kisim ol trabel man na haiwe i klia," PPC Solala i tok.


Deputi Gavana bilong Isten Hailans Mista Nakime i tok gavman bilong em i baim wanpela

nupela Toyota Lenkrusa long ol polis i yusim long dispela nupela polis patrol pos long Barola.

Em i tok ol i wok long toktok nau wantaim ol papagraun long sanapim pemenen polis stesen long hap. Ol raskol i save kam long olgeta hap bilong Hailans olsem long Kainantu, Henganofi, Komperi na Okapa long wokim bikhet pasin na taim ol i wokim inap mani, ol i save go bek long ol ples bilong ol.

Mista Nakime husat i mekim bikpela wok namel long ol wan-pisin i birua i bilip olsem planti holap ol i wokim em wok bilong ol yangpela man i nogat samting long wokim.

"Han bilong lo i longpela," PPC Solala i tok. "Ol raskol i ken ron tasol ol i no inap hait bikos ol wok man bilong mi bai kisim ol. Bai mipela i redi wantaim ol wok mipela i wokim wantaim ol arapela loman. Tasol mi no save long ol raskol. Mi ken apil tasol long ol long lusim ol bikhet pasin nau," PPC Solala i tok.



**Ela Motors**  
15 BRANCHES NATIONWIDE

PORT MORESBY PH 3229400 • LAE 4781800 • KOKOPO 9829100 • MADANG 8522188 • GOROKA 7321844 • MT. HAGEN 5421888 • WIEWAK 8562255 • KAVIENG 9842788 • KIMBE 9835155 • TABUBIL 5489060 • VANIMO 8571254 • PORGERA 5479367 • BUKA 9739915 • LIHIR 9864099 • ALOTAU 6410100

**Why Do More People Buy**  
**TOYOTA HIACE**

**You Get More than Just a Bus...**

- ✓ Most Popular vehicle in it's class
- ✓ More features ✓ Compatitively Priced
- ✓ More added Safety features
- ✓ Fully Supported by Toyota Genuine Parts and Quality Service Nationwide

Stock Available for immediate delivery Call in and see us Now!



# Moroi gavman gat bikpela sapot long volantia progrem



**BIKPELA HELPIM:**  
Gavana Moroi i givim ki bilong motobaik i go long Hilary Sylvester husat bai holim dispela motobaik long mekim-wok bilong em. Em i amamas nogut tru tasol em bai kam long siti long lainim ronim dispela motobaik. Etministreta Yibmaramba na ol lain opisa bilong Sentrel Provinsel Gavman na ol Boregaina komyuniti i lukluk i stap.



MINISTA BILONG FOREN AFES NA IMIGRESEN

## TOK SORI

Minista bilong Foren Afes na Imigresen Rt Hon. Sir Rabbir L. Namaliu, CSM, KCMG, MP long makim famili bilong em na olgeta wok manmeri bilong Ministri na Dipatmen i salim bikpela tok sori i go long famili na Gavman na Pipel bilong Pipels Ripablik bilong Saina long indai bilong **leit His Ekselensi Ambaseda Li Zhengjun** - wanpela long ol biknem Diploment na pikinini.

Leit Ambaseda Li Zhengjun i bin makim Pipels Ripablik bilong Saina insait long Papua Niugini na i bin mekim gutpela wok tru inap long tripela (3) krismas olgeta.

Dispela Gavman na ol Pipel bilong Papua Niugini bai tingim Ambaseda Zhengjun long bikpela wok em i mekim long kirapim na lukautim strongpela wok bung namel long Papua Niugini na Pipels Ripablik bilong Saina bai i stap strong wantaim bikpela tingting long wok moa we Saina i gat long helpim Papua Niugini insait long Nesanel Developmen wok bilong em aninit long PNG/Saina Diplometik Rilesens we i bin kirap long 1975 yet na i karamapim Developmen Koporesen o wok bung we i stap namel long tupela kantri bilong mipela.

Wok bilong Leit Ambaseda long strongim ol gutpela wok bung na pasin poroman namel long Papua Niugini na Pipels Ripablik bilong Saina bai stap long taim bihain.

Ol tingting bilong mipela i stap wantaim yu long dispela taim bilong sore taim yupela i makim indai bilong dispela bikman.

*Inap God i givim em malolo bilong obtaim*

RABBIE L. NAMALIU, CSM, KCMG, MP

Veronica Hatutasi  
i raitim

**SENTREL Provins Gavana Alphonse Moroi** i tok gavman bilong em i sapotim Viles Helt Voluntia Progrem (VHVP) na baset bilong em long dispela yia bai katim mani long go hetim dispela progrem.

Em i no tok hamas manimak ol bai katim long dispela bikos baset bilong provinsel gavman long dispela yia em ol i no pinisim yet.

Gavana Moroi i tokaut long dispela tingting bilong em long Boregaina misin ste-sen ias wik Fraide long opim bilong VHVP.

Long ai bilong samt-ing olsem 500 pipel husat i bin bung long lukim lons, Gavana Moroi i bin tok gavman bilong em i sapotim tru dispela kain progrem bikos em i stap long haus dua bilong ol pipel na ol komyuniti i gat sapot long em na ol tu bai kisim gutpela helpim.

"Provinsel gavman bilong mi i givim bikpela lukluk long dispela kain projek. Provinsel gavman i nogat bikpela mani tasol bai mipela i givim helpim inap long skel mipela i ken.

Mipela i putim dispela (VHVP) progrem long baset bilong mipela long dispela yia, na olsem, baset i no kamaut yet.

"Mi laik lukim kain progrem we bai mipela i tromoim mani na save olsem em i helpim gut pipel bilong mipela. Ol bin kirapim wankain progrem long Sogeri (sampela yia i go pinis) tasol em i feil bikos nogat mani.

Tasol nau, mipela i laik lukim dispela progrem i go het long helpim ol liklik pipel bilong mipela," Gavana Moroi i bin tok.

Em bin askim komyuniti na ol yangpela long sapotim na kamap papa bilong progrem bikos long dispela rot tasol na em bai wok.

"Tenkyu ol Kanosa Sister long kirapim dis-

pela progrem na bai mipela i wok patna long go hetim. Ol arapela progrem i feil bikos pipel i no save sapotim na kamap papa long em.

Bai mipela long Sentrel Provinsel gavman, ol Kanosa Sister, komyuniti, ol yangpela na ol dona bai wok wantaim long dispela gutpela projek.

Dispela projek i no bilong provinsel gavman tasol em i bilong ol pipel bilong Sentrel provins bikos em i kisim semis i kam olgeta long haus dua bilong yupela," Gavana Moroi i bin tok.

Taim em i tok tenkyu long ol yangpela voluntia na ol famili bilong ol long go insait long trening kos, em i askim ol long wok strong long sevim ol pipel bilong ol na pait egensim ol sik.

"I no isipela rot tasol yumi putim han wantaim na patna long dispela wok. Yumi statim dispela woa danis (welkam danis) na sapos dispela i gat mining long en, yumi wok patna na pait egensim ol sik insait long komyuniti bilong yumi na pipel i ken gat gutpela laip," Gavana Moroi i bin tok.

Em bin tok tupela samtig i wokim na helt sevis i no save go gut insait long ol komyuniti em long, ol pastaim gavman i save kisim ol dinau (lon) mani na ol dona long ol dispela projek.


Na taim mani helpim bilong ol dona i pinis na ol i go, projek i no moa go het bikos nogat mani na komyuniti sapot. Narapela samtig em daunim strong bilong Kina i kamapim hevi long rot we gavman i kisim sevis i go aut long ol komyuniti na pipel.

Em i tok ol samtig i kamap ausait i kontribut long rot we gavman i karim sevis i go long pipel na ol komyuniti.

Na em i tok VHVP em i gutpela progrem na gavman bilong em bai sapotim aninit long Midium Tem Developmen Progrem.



Raun Lukim ol Meri na Pikinini



SAPOTIM OL, PIKININI: Bikpela sapot long welfea bilong ol pikinini long PNG em Ume Wainetti bilong CIMC, Dokta Isiy Ndombi bilong UNICEF na Dokta Joseph Pagelio em Ekting Seketeri bilong Edukesen long lons bilong Wol Pikinini Ripot.



MANUS STAIL: Kain samsam danis bilong ol Manus planti lain i save laikim!



REDI LONG LOTU: Ol pikinini long Erima Peis i redi long go insait long sios.




LAINIM NA SAVE: Ol dispela pikinini long Kokl Luteran Sios i no stap nating long skul malolo taim, nogat. Ol bin-go harim ol aweanes toktok long HIV/AIDS.

PNG i gat salens long Pikinini

Veronica Hatutasi i raitim

PAPUA Niugini i gat bikpela salens long sait bilong ol pikinini na wok patna namel long gavman, praivet sekta, sios na ol NGO na ol papamama.

Pikinini i bikpela samting na taim mama i karim nupela pikinini, bikpela amamas i save kamap long famili. Long PNG kastom o tumbuna pasin, nogat pikinini i bin bungim hevi olsem painim ples long stap, hangre na painim kaikai. Na papamama i no bisi long em. Sapos papamama i bungim hevi, ol bubu na hauslain i stap. Tasol long tude, taim i senis na wantaim, olgeta samting. Laip i go hat tumas na pasin bilong lukautim wanpela narapela i no strong tumas. Olsem na moa yet long ol bikpela taun na tu long ples, planti pikinini i wok long raun nating long strit na painim kaikai samting. Na bikos nogat bikpela lain long givim ol stia na ol samting ol i laikim long helpim ol long laip, ol i go insait long pasin raskol. I luk olsem planti famili i wok long gat ol pikinini tasol ol i no inap long lukautim ol long ol "basic needs" olsem putim ol long skul, lukautim helt sait, kaikai, klos na laik pasin we papamama i mas



PNG MAS WOK HAT: Dokta Pagelio, Dokta Ndombi na Ms Wainetti long lonsim bilong Wol Pikinini Ripot.

givim long ol pikinini bilong ol.

Ol pikinini i stap gut, gutpela wok developmen bai kamap long kantri.

Tasol olsem wanem nau long PNG, wanem situesen bilong ol pikinini long PNG glasim wantaim wol?

UNICEF i bin lonsim Ripot long stap bilong ol pikinini long Wol na glasim situesen long PNG 3-pela wik i go pinis.

Strongpela toktok i bin kamap long PNG na wol, planti pikinini nau i olsem "excluded and invisible". Dispela em ol lain we i stap long ol trangu komyniti, ol pikinini meri i nogat

gutpela luksave na ol i no kisim ol sevis, ol pikinini we papamama i dai long HIV/AIDS na tu ol dispela i gat dispela sik, ol pikinini we i kisim bagarap olsem seksuel vai lens, ol pikinini we papamama i no bisi long ol na ol pikinini long ol ples na kantri i gat pait long em.

Yunaitet Nesens i putim yia 2015 long ol kantri long wol long inapim ol Midium Tem Developmen Gol (MTDG) we PNG i wanpela long ol.

Ekting Edukesen Seketeri Joseph Pagelio i bin makim Edukesen Minista Michael Laimo

long lons bilong Wol Ripot bilong ol Pikinini long Wol i bin tok long kamapim gutpela developmen na inapim ol MTDG yumi mas wok bung wantaim long sevim ol pikinini we i stap hait na ausait long eria we sevis i go long em.

Em i tok long rot ol samting i go long em, PNG bai ino inapim ol MTDG long yia 1015 bikos ol statistik o ripot i soim ol salens kantri i gat yet long em olsem: haf long ol pikinini inap long stap long praimer skul level i no stap long skul, Mak daun-bilo long 10 pesen ol pikinini na bikpela man-

meri i save dai long haus sik na ol ples na dispela i min olsem helt semis i no go gut na olsem, yumi mas givim bikpela luktuk long kisim helt sevis i go long ol pipel, samting olsem 50 nupela HIV pipel, moa yet ol yangpela pipel.

Na dispela i putim hevi long laip bilong ol pikinini, planti meri na ol pikinini i save kisim hevi na bagarap tasol ol i nogat sans long go long ol loman o welfea. Na planti yangpela i nogat sans long skruim skul na kamapim gut laip bilong ol.

Mista Pagelio i bin tok long kamapim senis na inapim ol samting bilong kamapim gut ol pikinini, strongpela laik na wok bilong ol politisen i mas kamap long inapim ol plen ol i kamapim long dispela. Na olgeta grup i mas wok bung wantaim.

"Ino olsem yumi luksave long wok tasol yumi mas redi long helpim ol pikinini. Yumi mas kamap olsem patna bilong ol, lukluk long sapotim na strongim ol na lukautim ol wantaim save olsem visen o driman bilong MTDG em wol i gat pis, ikwaliti, sekyuriti, luksave, fridom, luksave long envaironmen na serim ol wok bilong lukim olsem yumi no abrusim na haitim ol pikinini," Dokta Pagelio i tok.

Lo bilong lukautim ol meri na pikinini



Skruim Mentens Toktok

LONG komplein fom yu mas raitim long wanem taim na long wanem ples man bilong yu i bin pinis long lukautim yu na ol pikinini, o long wanem taim na long wanem ples yu bin lusim em. na tu yu mas raitim ol nem na krismas bilong ol pikinini bilong yu. Yu mas promis olsem olgeta toktok yu mekim long komplein fom i tru.

Long komplein fom yu mas raitim long wanem taim na long wanem ples man bilong yu i bin pinis long lukautim yu na ol pikinini, o long wanem taim na long wanem ples yu bin lusim em. Na tu yu mas raitim ol nem na krismas bilong ol pikinini bilong yu. Yu mas promis olsem olgeta toktok yu mekim long komplein i tru.

Long samons fom, yu mas raitim ol wankain toktok yu raitim long komplein fom, na yu mekim dispela kot aninit long Deserted Wives and Children Act long:

- Mentenens bilong yu yet, aninit long s.3 (1) (a) (iii);
- Kastodi bilong ol pikinini, aninit long s.3 (1) (a) (iv).
- Mentenens bilong ol wan wan pikinini, aninit long s.3 (1) (a) (v)

Sapos yu gat wok, yu mas askim mejistret long sampela mentenens bilong yu yet, maski sapos yu askim long K1 long wan wan wik. Dispela i ken helpim yu sapos yu lusim wok bihain. Sapos yu gat oda pinis, bai i moa isi long go bek long kot na askim lot long apim mani i go antap; bai i hat liklik long askim kot long mekim nupela metenens oda.



Shake-N-Bake Pizza (Sekim na Beikim Pitsa)

Yu mas i gat:

- 1 na ¼ kap self resing Flaua
- ½ kap Sis yu gretim o sigirapim pinis
- ¼ kap wel
- ½ kap wara i hot

We yu Kukim:

- 1- Putim olgeta ingredien long wanpela kontena.
- 2- Pasim gut na seksekim kontena wantaim ol samting insait long en.
- 3- Rausim ea long kontena na seksekim gen.

Ol samting we yu ken putim antap long Pitja

- 1- Tomato Peis, mozzarella sis, painapel yu katim i go liklik na mekmekim pinis, hem o beikenb, kepsikum yu katkatim pinis, anien yu katkatim pinis, na moa mozarella sis.
- 2- i gat inap dou long wokim tupefa 9" raunpela trei o wanpela bikpela beking trei. Beikim inap long 40 minit long mak bilong hot long aven inap long 400 digris F.

STORI TASOL



wantaim

FR. PAUL LIWUN, SVD

Pret i pinis

wantaim amamas

TAIM Supiria o bos bilong mi i bin tok yesa long aplikesen bilong mi long kam wok long Papua Niugini, mi bin kisim planti wari tru. Bikos mi bin harim kain kain stori nogut bilong PNG. Tasol mi laik kisim dispela sa lens, olsem na wantaim dispela pret pasin i stap long tingting bilong mi, mi lusim papa mama na brata susa bilong mi, lusim kantri bilong mi Indonesia na kam kamap long PNG long yia 1990. Nau mi bin stap amamas na wok long dispela kantri yet.

Narapela prèt pasin i bin kamap long mi yet long taim mi stap wok long Enga Provins na bos bilong mi i askim mi long kamap peris pris long Erima. Mi tok nogat tru. Bikos i gat kain kain stori nogut i kamap long Pot Mosbi na Erima. Ol i tok Erima em i no gutpela ples. Tasol bihain mi kisim dispela sa lens, na stat wok long yia 1998 inap nau. Mi amamas na wok i stap yet long Erima peris. Harim stori tasol, i no inap. Yumi yet i mas kam, stap na lukim wanem samting tru i kamap long dispela ples. Yumi Tasol i kamapim ples nogut o gutpela ples.

Stori daunbilo bilong tupela twin i stap insait long bel bilong mama bilong ol. Sampela wik i go pinis, na twin i gro. Tupela i singsing amamas stap long bel biiong mama: "I gutpela tru yumi kisim laip". Mama bilong tupela em i wanpela gutpela mama. Tupela i stap bosim bel bilong mama bilong ol. Taim ol i bungim rop bilong mama i givim laip long ol, tupela i singsing amamas moa moa yet: "Mama bilong yumi em i gutpela mama tru, olsem na em i no wari long serim laip bilong em wantaim yumi".

Sampela mun i go na tupela i gro na senis. Taim tupela i lukim olsem tupela i senis; wanpela bilong ol i askim: "Wanem mining bilong dispela samting?" Narapela i bekim: "Em i min, laip bilong yumi insait long bel bilong mama i klostu pinis nau". Tasol narapela twin i tok: "Tasol mi no laik lusim bel bilong mama, mi laik stap long hia oltaim oltaim."

"Tasol yumi nogat sois", narapela i tok. "Na tu, ating i gat laip bihain long mama i karim yumi". Tasol narapela twin i strong yet na i tok: "Mi no bilip. Olsem wanem i gat laip bihain long mama i karim yumi? Yumi stap laip long helpim bilong rop bilong bel bilong mama, olsem wanem yumi bai bruk na separeit long rop bilong mama, bai yumi kisim laip long we? Tingim tasol ol narapela lain i bin stap insait long bel bilong mama bipo. Ol i bin lusim bel bilong mama na go aut. Inap tude, i nogat wanpela bilong ol i bin kam bek. Em i mak olsem dispela em i pinis bilong laip bilong yumi"

Olsem na dispela twin i krai sori tru na i tok: "sapos laip bilong yumi insait long bel bilong mama i pinis wantaim indai, bilong wanem yumi kamap? Yumi stap long bel bilong mama em i nogat mining bilong em. O nogut yumi nogat wanpela mama i stap? Nogut yumi tasol i kamapim em."

Tasol narapela twin i gat strong yet na i tok: "Tasol yumi i gat MAMA. Sapos nogat MAMA, bilong wanem yumi kamap long hia? Olsem wanem yumi kam insait na stap long hia?"

Las de bilong twin insait long bel bilong mama i bin pulap wantaim kain kain askim na tupela i pulap long prèt pasin. Na nau taim bilong karim i kamap. Taim tupela i kamaut long bel bilong mama na opim ai bilong ol, tupela i KRAI BILONG AMAMAS bikos wanem samting ol lukim i no wankain olsem ol i bin tingting bipo.

Man i laik kilim leit Pop i lusim kalabus

MAN husat i bin traim long kilim dai leit Pop John Paul 2, hetman bilong Katolik Sios long wol long yia 1981 i kamap fri man nau.

Mehmet Ali Agca i gat 48 krismas bilong kantri Teki long Yurop i bin kamaut long haus kalabus long las wik Fraide Janueri 13 bihain long em i bin stap long haus kalabus long Itali na Teki long 25 yias. Na em inapim taim ol i makim long kalabus i pinis.

Em i bin pinisim taim bilong em long haus kalabus long Istanbul, Kapitel bilong Teki bihain long ol i bin trenferim em long Itali i go long hap long yia 2000. Dispela em bihain Itali i bin pogivim em na larim em i go.

Long 1981, Pop i bin mekim bikpela lotu long Sen Peter's Basilika we planti bilip manmeri i bin bung taim Agca i sut wantaim gan we i sutim yang-



LAIKIM BIRUA: Leit Pop John Paul 2

pela Pop John Paul 2 husat i bin stap long namba tri yia tasol olsem Pop, tasol em i no dai. Em bin kisim bikpela bagarap tasol na ol i kisim em i go long haus sik. Long wankain taim tu, Agca i bin sutim dai wanpela niusman bilong Teki yet.

Tasol sampela yia bihain, leit



ALI AGCA: Man husat i bin traim long kilim Pop.

Pop John Paul 2 i bin go lukim Agca long Itali haus kalabus na sekanim em, tokim em olsem em i lusim olgeta belkros long dispela birua na tupela i kamap poroman. Taim Pop i bin dai long mun Epril las yia, Agca i bin salim tok sori bilong em tu.

Ol ripot i tok wanpela wait-

pela sedan ka i bin kisim Agca husat i putim blupela sweta na jin trausis i kamaut long geit i gat strongpela sekyuriti long Kartal haus kalabus.

Ol neseneis sapota i bin amamas taim em i go aut.

Brata bilong en Adnan Agca i tok ol i amamas brata Mehmet i kamaut nau long kalabus. Planti lain i bin tukluk aut long ol widua bilong ol taim Agra i kamaut long kalabus.

Long wankain taim, brata Adnan i tok Mehmet Agca i laik bungim nupela Katolik Sios hetman, Pop Benedict 16.

"Sapos Pop i tok orait long askim bilong em, em bai go long Rom. Nau em i sambai tasol." Adna i tok.

Narapela tingting em sapos Pop Benedict 16 i mekim raun bilong em i go long Teki, tupela i ken bung.

HÉLT VOLUNTIA PROGEM:

Sister Leonor Djan em wanpela Karitas Kongriksen Sister i wok long Boregaina Peris long inlen Rigo, Sentrel provins i toktok long liklik histri bilong progrem long taim bilong lonsing las Fraide. Ol Kanosa Sister i bin lukim olsem komyuniti i laikim stret progrem na ol i kirapim long Peris bilong ol.



Piksa: Veronica Hattas

Gutpela tingting i kisim Joe

Namba tri hap stori bilong yangpela bikhet man i tanim bel. Dispela yangpela man

EM i tok plen bilong dispela roberi o stil pasin i bin kisim olsem 4-pela krismas. Wok ol i bin givim long Joe insait long dispela stil pasin plen em long karim mani i kam ausait long Beng bihain long ol i haijekim helikopta long ples balus na i go insait long bipo PNGBC.

Joe i tok taim bilong karimaut plen i bin i kamap, em i ino stap insait long grup bikos dispela taim em i bin stap long haus sik bihain long polis i bin sutim em long nek bilong em taim em wantaim sampela poroman bilong em laik traim long ron wantaim wanpela ka ol i bin stilim.

"Tupela de i bin stap yet bipo long mipela i karimaut dispela bikpela stil long bipo PNGBC, taim ol polis i bin sutim mi long nek bilong mi na stap hap dai long haus sik," em i tok.

Joe i tok olsem stori bilong dai bilong olgeta 5-pela poroman bilong em husat ol i bin dai long han bilong polisman taim plen bilong ol long "milenium roberi" i no go stret, em i bin harim bihain stret bikos dispela taim em tu i bin stap long mak bilong dai long haus sik.

Tupela Sios wokbung i pinis

WOK bung na ol tok-tok i go het long ol bikpela sios long wol na tu, PNG, long strongim dispela.

Long dispela yia, ol bai putimaut ripot long ol wok bung we ekumenikel grup bilong tupela Katolik na Luteran Sios i wok long em long sampela yia nau.

Intenesenel Luteran-

Roman Katolik Dailok em nem bilong dispela wok bung we ol Komisn memba Luteran-Roman Katolik Komisn long Yuniti i save bung na toktok long ol samting we tupela sios i laik kamapim wantaim.

Namba wan hap bilong ol toktok i bin pinis long pinis bilong yia we yumi kalapim tasol tupela wik i go

pinis. Bikpela samting we ol bin toktok long en em long "Apostolisiti bilong Sios" o wok aposel bilong sios. Ol bikpela samting i kam aninit long dispela topic em, Faundesen o as bilong Nupela Testamen, Apostolik Gospel na sios olsem em i Apostolik, Ministri bilong ol pater, Bruk long sios na pasto o Odein Ministri na Skul bilong Sios we i stap tru olgeta taim.

Tupela sios wantaim i bin luksave long as bilong sios long ol aposel na ol bin painim rot long stretim ol samting we i narakain namel long tupela we i sut long dispela na tu, long promis ol pater i wokim taim ol i kamap pater long wok insait long ministri. Ol toktok namel long tupela sios i bin stat long yia 1967. Na dispela namba wan hap we i pinis tasol i bin stat long yia 1995.

Tupela sait wantaim i lukim ekumenikel muvmen olsem em i

wanpela rot insait long sios we ol patna i redim ol graun wok long strongim wok bung wantaim tasol, luksave tu long wanpela narapela.

Luteran Wol Federesen (LWF) na Pontifikel Kaunsel long Promotim Kristen Yuniti (PCPCU) i wok long go pas long ol toktok.

Bikos dispela em i pinis long namba wan hap long ol toktok insait long 10-pela yia, PCPUC Presiden Walter Kadinel Kasper na LWF Jenerel Seketeri Reveren Dokta Ishmael Noko i bin autim tok tenkyu bilong ol i go long ol memba long gutpela wok bilong ol.

Ol ripot ol bin kamapim na prinim pinis em long Gospel and the Church (1972), Eucharist, (1978), Ways to Community (1980), The Ministry in the Church (1981) Facing Unity (1984) and Church and Justification (1994).

AS BILONG PASIN BILONG BILIP. Pasin bilong bilip em i olsem. Yumi save gut tru olsem, olgeta gutpela samting God i promis pinis long givim yumi na yumi wet long kisim, em bai yumi kisim tru. Maski ai bilong yumi i no lukim ol dispela samting, yumi save gut tru olsem, dispela olgeta samting i stap. Ol man bilong bipo ol i bin bilip, na God i amamas tru long pasin bilong ol na kolim ol i gutpela man. Yumi bilip, olsem na yumi save graun i kamap long tok bilong em yet. Olsem na olgeta samting yumi inap lukim, em God i wokim long samting yumi i no inap lukim. Abel i bilip long God, na i mekim ofa long em. Na God i laikim ofa bilong Abel, tasol em i no laikim ofa bilong Kein. Abel i bilip, na long dispela as God i laikim ol presen Abel i givim em. Na dispela i soim yumi olsem God i kolim em stretpela man. Abel i dai pinis, tasol long dispela bilip bilong en i olsem em i autim tok yet long yumi. HIBRU 11:1-4



AMAMAS LONG PROGEM: Ol mama na pikinini long ples Boregaina bai kisim helpim long Vles Helt Voluntia Progrem Sentrel provins Gavana Alphonse Moroi i bin tonsim long dispela wik.

# TOK LUKAUT

wantaim

## DAVID EPHRAIM



### Gavman i mas strongim sevis

POLIS i sutim dai ol raskol, ol soldia i go insait long wo na planti i dai.

Ol raskol i kilim dai manmeri. Husat i givim rait long ol manmeri long kilim dai narapela. Planti taim yumi toktok tumas long kamapim gutpela sindaun na amamas insait long kantri na tu long wol. Tasol planti dai i save kamap long han bilong lo. I tru olsem insait long konstitusen em wok bilong ol soldia na polis long bringim sevis long lo insait long komyuniti na kantri wantaim.

Mi laik bringim dispela topik long kirapim sampela gutpela ting we em ken helpim yu long kamapim gutpela sindaun.

Na yet long kantri i gat planti ol yangpela i save dai long han bilong polis, planti taim yumi save tok planti raskol lusim ol i go. Tasol tingim konstitusen o mama lo bilong kantri i tok long protektim o lukautim ol raits bilong manmeri husat i sitisen bilong en. Planti taim ol manmeri i stii bikos ol i painim hat long baim o stap laip insait long taim nau yumi stap we laip i hat moa yet taim yumi lukim prais long kago na sevis i go antap moa.

Insait long dispela Gavman na ol Yunaitet Nesens (UN), i gat as tingting long kamapim gutpela sindaun insait long ol kantri bilong wol. Ol i go het na kamapim milenium gol o rot we ol memba kantri bilong UN i ken bihainim long kamapim gutpela sindaun.

Tasol dispela Gol em planti i no bihainim na tu ol manmeri i no klia tumas. Bilong wanem na dispela kain as ting ol i gat tasol planti dai i kamap long han bilong ol.

Yumi lukim ol bik manmeri bilong kantri bilong yumi; planti taim ol bai toktok long gutpela sindaun tasol ol i no save pen we ol liklik manmeri i kisim olsem long kago na sevis bilong gavman i go long pipel. Em ol hevi, nau wanem rot bai yumi wokim kamap we planti ol manmeri i ken amamas long en. Namba wan rot em edukesen, insait long UN i gat kain rot o polisi we ol memba kantri i mas wokim kamap mak bilong ol level bilong edukesen i mas fri. Dispela bai helpim kamap gutpela save manmeri long olgeta level.

Yumi i no kamapim. Bilong wanem na edukesen em wanpela samting we yumi mas mekim kamap? As em tingting na save em i pas long kalsa bilong ol waitman tude yumi i kamap long harim na lukim na bihainim. Tasol wol bilong ol waitman i wol we yumi lainim olsem rit na yu wokim kamap wantaim rot we ol i laikim yu wokim.

Na to rot em long kamapim o strongim pasin bilong senis insait long kalabus. Bilong wanem nau planti moa manmeri i stap insait long kalabus dispela we ol i ken wokim planti senis insait long kantri?

Na tri em, Gavman i mas bihainim stret lo bilong kantri long lukautim ol pipel bilong en. Em mas strongim ol sevis bilong en i go long pipel; insait long dispela em mas wokim edukesen na helt sevis i mas kamap namba wan as tingting bilong en.

# Wokbung long edukesen

Noreen Dada i raitim

SINGAUT i go long ol Provinsel Edukesen atoriti long sapotim gut ol skul na ol i ken ron gut na ol pikinini i kisim gutpela kwaliti edukesen, Edukesen Minista Michael Laimo i tok

Long wankain taim tu, em i tok edukesen i wok bilong olgeta man na olgeta i mas lukim ol pikinini i kisim gutpela skul.

Mista Laimo i singaut tu i go long mamapapa long sapotim ol tisa na sumatin long wanem we ol i ken helpim olsem wok bung wantaim ol tisa na baim skul fi.

## .....Papamama gat wok

Minista Laimo i tok tenku tu long ol sios, wan wan man, dona ejensi na non-gavman ogenaisesen long helpim i developim edukesen insait long kantri.

Sapot bilong ol provinsel edukesen otoriti long ol skul bilong ol i mas go het we ol i mas givim sapot long sait bilong ronim ol skul, wok na developmen na ol pei na entaitolmen bilong ol tisa.

"Bikpela samting long dispela taim em long ol provinsel etministresen long pinis redim wok bilong ples ol wan wan

tisa bai wok long na redim inap mani long ol tisa i baim rot long ol ples ol i tisa long em ol i ken stat wok long Januari 23," Minista Laimo i tok.

Salens i go aut long memba bilong ol skul bod na gavaning kaunsel long sapotim ol tisa bilong ol long menesim na developim gut ol skul na ol i ken ron gut.

Wankain singaut i go long ol komyuniti memba long givim sapot bilong ol we nogat raskol pasin i ken kamap.


Minista Laimo i mekim dispela toktok bihainim ol ripot

olsem wanpela praimer skul long Finshafen i pas. Na wok painimaut long reip o bagarapim wanpela liklik meri i gat 12-pela krismas long las yia Novemba lsten Hailans Provins.

Mista Laimo i tok ol skul i samting bilong ol komyuniti na komyuniti yet i mas lukautim gut, sumatin na tisa long raskol pasin we i ken bagarapim skul bilong ol pikinini.

"Mi singaut long dispela tupela komyuniti long wok wantaim plis long hariapim wok painimaut we lo i ken givim mekim save long ol lain husat i mekim dispela asua," Minista Laimo i tok.

# TB Dokta go skul long Japan



GO SKUL: Dokta Joe Bana-Koiri save pait hat long daunim sik TB long NCD.

Veronica Hatutasi i raitim

MAN i go pas long wok bilong TB long Pot Mosbi Jenerel Haus sik Dokta Joe Bana-Koiri i go pinis long Japan long skul.

Em bin lusim kantri long las wik Tunde Januari 10 bilong wokim 6-pela wik skul long TB Rises Senta

long Tokyo, Kapitela bilong Japan.

Dokta Bana bai skruim skul long wok bilong menesim sik TB na ol arapela eria bilong dispela sik.

Menesmen bilong Pot Mosbi Jenerel Haus sik aninit long Helt Dipatmen i bin makim em long go long dispela skul.

JICA i makim Gav-

man bilong Japan i sponsaim Dokta Bana-Koiri long dispela stadi bilong em.

Dispela em i namba tu hap long skul we Dokta Bana-Koiri i go long em. Namba wan hap we em bin go long en em long yia 1996.

Dokta Bana-Koiri em dispela dokta husat strongim wok long pait egensim sik TB insait long Nesanel Kapitela Distrik.

Dispela sik i wok long go bikpela long PNG na insait long Pot Mosbi sifi, planti pipel tumas i kisim dispela sik.

Dokta Bana-Koiri i wok hat tru long kisim moa sapot long daunim sik TB bikos em i gat marasin long oraitim. Tasol nogat long sik AIDS.

Na taim bikpela mani sapot i go long AIDS, nogat tumas i go long sapotim ol wok long daunim sik TB.

Long PNG, 6, 000 pipel i save kisim sik TB long wanpela yia. Na Pot Mosbi i gat bikpela mak long 1,400 nupela pipel olgeta yia i save kisim sik TB. Lae i namba tu long em.

PNG i ken kontrolim sik TB tasol ol dispela samting i blokim rot.

Em long sot long ol drag, hevi lobng eksrei i bagarap, planti klinik

long siti i pas, nogat. Trensopot long kisim ol helt woka bilong sik TB i wokim TB raun long ol klinik.

Na sot long mani em i as bilong ol dispela hevi.

Narapela samting em ol TB siklain i no kisim gut marasin taim ol i stap long DOTS progrem o TB Dairek Obsev Tritmen Sevis.

# Daru Haus sik ron gut

Noreen Dada i raitim

DARU Haus sik i wok long ron gut aninit long Ekting Edmnistresen wantaim nogat bikpela trabel.

Sampela ripot i bin kamaut long yia i go pinis olsem i gat bel hevi namel long ol wokman bilong haus etministresen na bod tasol wanpela maus-

man bilong haus sik i tok wanem hevi ol i bin gat i pinis na nau ol i wok wantaim long ronim haus sik gut.

Ligel Sief Eksekutyutiv Opisa (CEO) Dokta John Konga i wetim tok orait we bai kam long bod bilong hau sik long larim em long kisim bek posisen bilong em. Dokta Konga i bin sanap i go daun olsem

CEO bilong Daru Haus sik long sampela mun i go pinis long 2005 namel long hevi em i bin gat long sait bilong famili bilong em.

Ekting Direkta bilong Medikol Sevis ( husat i tokim Wantok em i les long autim nem bilong en) i tok haus sik bod wantaim ekting etministresen i wok bung wantaim long ronim gut

haus sik.

Long dispela taim, Daru Haus sik i wok long ron aninit long Bod Het, Tutwe Olewale wantaim Ekting CEO na Dairekta bilong Medikol Semis, Thomas Anai. Tupela bai stap i go inap bod i tok orait long Dokta Konga long kam bek long wok.

# Lusim pasin braiberi na wantok sistem

**Dia Edita**  
 MI LAIK autim bel hevi na lukluk bilong mi i no stret. Yumi PNG putap long pasin bilong braiberi na wantok sistem. Olsem na mi ken tok olsem sapos yumi lusim dispela pasin bilong braiberi na wantok sistem ating yumi bai dai o bai yumi kamap rabis stret. Olsem na hat long lusim dispela.

Yumi mas save dispela pasin tasol kamapim korapsen na wok bilong kantri bilong yumi PNG i no save stret. Mi laik toktok liklik long ol wok marimari bilong gavman dipatmen. Yupela i mas isi liklik, gavman bilong yumi i save baim yupela long wokim dispela wok.

Tasol nogat yupela i save laik long kisim tupela pe. Em wanem gavman em gaden bilong papa bilong yupela o bisnis bilong tumbuna bilong yupela. Yupela sem long dispela na lusim na wokim wok stret. Na mi laik toktok tu long ol F.A.S. na ol dairktas bilong

gavman dipatmen, yupela tu isi liklik long putim glaman kleim na kisim mani nating nating.

Em i no mani bilong yupela em mani bilong wokim wok na ol pipel i kari lukim na amamas na tok gavman i putim dispela na em luknis ol bai tok olsem na amamas long em. Mani yupela i save paulin nating nating na opis bilong gavman dipatmen. I no save luk gut na nais. Em dispela as tasol na wok bilong gavman i save i go bagarap.

Em tasol bel hevi na lukluk bilong mi i no save stret long em mi putim i kamaut long pablik. Olsem na yu husat brata na susa yu laik sapot o agensim yu rail tasol i kam long Wantok bilong yumi yet na mi ken lukim.

**HERU ANABISA BOROKO NCD**

## Birua bilong Krai i kamap pinis

**Dia Edita**  
 MI LAIK kirapim tingting tasol olsem, tude birua bilong Krai i kamap pinis long wol na sios tude na kamap ol kristen. Tasol nogat. Ol i kamap olsem wel dok long kilim ol sipsip i stap tu long hia long PNG.

Harim ol lotu i kamap pas em nau bai yu lukim ol senis bilong developmen na wan wol sios i kamapim tumora bai yu lukim long ai bilong yu yet. Long inapim Baibel propesi long 1 Jon 2:18-23; 1 Jon 4:1-3; Rev 13:1-18; Rev 17:1-18.

Sios tude i kamap olsem gavman na gavman pawa bai wok na politik bai stopim pasin bilong autim tok bilong God long strit long yia 2006 i go olsem na demokrasi bai pinis na wan wol gavman na wan wol sios i kamap long kontrolim de na taim bilong lotu.

Harim. Masin bilong namba 666 i stap long kantri pinis. Tasol em i wetim man husat bai i go pas long rulim o kontrolim. Ol pren na wantok yu sensim tingting nogut bilong yu na yu tanim bel insait long Jisas Krai tu o nogat.

Sapos yu no yet tanim bel nau em gutpela taim na awa bilong yu long kam long Jisas Krai na bai yu save long marimari bilong God bai kamapim yu long dispela birua inap 3 yia, 42-pela mun na 1,260 de na bihain bai pawa bilong birua i pinis na Jisas Krai i kamapim gut taim bilong Kingdom bilong em inap 1000 yia.

Plis husat laik long sapotim mi yu rail long Wantok Niuspepa.

**REMECUS ALOUIS NOUPRA WEWAK IS SEPIK PROVINS**

## Pikinini Hela noken kamap olsem pamuk meri

**Dia Edita**  
 MI WANPELA mangi Ipa Timalia insait long Komo Distrik. Mi no save amamas long pasin we yumi Hela save mekim long taim bilong vot o makim lida. Yumi save bihainim mani man olsem pamuk meri i save bihainim mani man. Dispela kain dok pasin bilong yumi

Hela i pinis nau long yia 2006 na i kambek wantaim man tingting long yia 2007. Em tasol husat Hela yu i laik bekim mi wetim yu long Wantok Niuspepa.

**JOHN WAKIRIA MT HAGEN WESTEN HAILANS PROVINS**

## Praim Minista mas luksave long Sepik Solidarity Group

**Dia Edita**  
 MI RAITIM dispela open leta i go long Praim Minista Sir Michael Somare na Kolisen Gavman bilong em i mas luksave long wanem wok Sepik Solidarity Group i wokim pinis long 6-pela mun i go pinis long rausim wok korapsen insait long Is Sepik Dipatmen.

Siaman bilong Grup John Kriosaki na mausman Bruce Samban i laikim wan-

pela miting wantaim Sir Michael hariap tasol bikos planti samting i wok long bagarap long Is Sepik provins.

Mi laik askim Sief Sekreteri Joshua Kalinoe na Plening Sekreteri Valentine Kambori long toktok wantaim Praim Minista long wok bilong Sepik Solidarity Group.

**JOHN KRISAKI WEWAK IS SEPIK PROVINS**



## Kumbakor i gat strong yet

**Dia Edita**  
 MI WANPELA mangi Nuku long Sandaun provins. Mi laik autim wari bilong mi i go long nupela kandidate i laik resis wantaim Mista Andrew Kumbakor. Mi laik tok olsem sore tru yu husat nupela kandidate i laik traim wantaim Andrew yu bai nogat stret. Bai yu westim nating bikpela mani bilong yu. Olgeta pipel long ples ol laikim Andrew bai sanap yet long Nuku Open Mema. Long wanem as? Wok bilong Andrew i winim ken wok bilong ol memba bipo we i nogat wanpela developmen i kamap long ples. Nogat tru. Bikpela mani

yupela kaikai nating wantaim meri, pikinini bilong yupela. Olsem na nau em taim bilong ol Gikana yet bai sanap long Nuku Open. Maski yu save man o yuni-vesiti man, save bilong yu em samting nating, yu no nap ronim gut wok developmen. Kaikai mani em ples klia, na developim ples em nogat. Olsem na nara-pela ileksen Andrew bai sanap yet. Tenkyu tru na yu husat man o meri i laik sapotim em orait.

**FRANCIS A. JIKANDA KIMBE WEST NU BRITEN PROVINS**

## Apim pe bilong ol grasrut

**Dia Edita**  
 SAMPELA krismas i go pinis na nau mipela i stap long nupela yia. Mi lukim sampela samting i no kamap gutpela long PNG manmeri. Mi toktok long dispela samting i no kamap gutpela long tingting

bilong mi.

Pe bilong ol Leiba Reit i stap long wankain level long 2002. Long dispela astingting DPM i mas lukluk na apim pe bilong ol grasrut manmeri.

Na pe bilong ol stua em antap tumas. Na pe bilong ol

manmeri i stap K65.83 na K67.97 na dispela mani em i no save helpim ol famili gut. Dispela em bikpela hevi bilong PNG.

Na dispela em jenerel salari bilong PNG grasrut manmeri pe i no i go antap. I stap daun-

bilong na long wanem as na i no save senis? Tingting long yu yet tasol. Tenk yu long harim bilong yupela.

**BEN KENORI BOROKO NCD**

## Indipendens selebresen i bin kamap gut

**Dia Edita**  
 DISPELA bel wari bilong ol pipel long Not Waghi i olsem i no bin gat ol independens selebresen long Kimil, Banz, Nondugl ples bilong Not Waghi distrik. Ating Nesenel gavman i no bin putim sampela mani long Not Waghi selebresen. Tu Westen Hailans Provinsel Gavman i no bin putim mani long Not Waghi.

Long deit 16 Septemba 2005, olgeta ples long Not Waghi i no amamas tru tru long independens. Ol memba long PNG selebret gut wantaim ol pipel na olsem wanem long Not Waghi?

**MATT DEDEBOH HOLEYAH BANZ WESTEN HAILANS PROVINS**

## Man kamap bik bel long sik bilong pik

**Dia Edita**  
 MI SAVE amamas long raitim pas long edita na tu mi save amamas long ritim ol manmeri i rait long Wantok. Mi laik tumas long bekim pas bilong P.i. long Lorengau, Manus provins.

Yes brata mi wanpela man bilong traipela bus

Hailans tasol ol man bilong Manus na ol Musau Allan i kam long ol na karim toktok bilong bikpela kisim mipela ol busman. Em mi wanpela mi Peter na olsem wanem na yu paol long toktok bilong God Yaweh? Mi askim yu sapos SDA misin i stap long Manus, orait

go stadi wantaim ol long Buk Tambu. Long Genesis i go long Revelesen em bai yu painim tru God, na brata lotu SDA kam long 5-pela Hailans na mipela save kalabus long pik gris. Em SDA misin soim tru sabat na rausim pik gris. Brata mi no laikim yu dai hariap,

so yu lusim pik, bia, smuk na kaikai buai, na giamanim ol sios memba bilong yu, mipela i stap long lotu SDA na ol 5-pela Hailans senis long tru lotu.

Skul bilong lotu SDA go olsem, Lotu SDA skulim ol man long tok tru Jisas, ol manmeri

long baptais, long lukautim bodi na helt, long lusim dring na long kipim sabat holi.

**PETER P. NANA MT HAGEN WESTEN HAILANS PROVINS**

**Toksave:**

Sampela ol pas mipela i kisim i longpela tumas na i no givim spes long ol arapela pas, plis raitim pas liklik.

Na tu putim nem na adres bilong yu long olgeta pas yu salim i kam, tenkyu.

- Edita

**WANTOK**  
**KOMENTRI**

**Lida i mekim pasin reip i noken karim nem lida**

WOK PAINIMAUT nau i go het long painim husat tru i bin go pas long givim tok orait long bipo memba bilong Raikos na man husat nau i stap long kalabus bihain long kot i sasim em long reip o bagarapim meri, long kamaut long kalabus long kamapim wanpela bikpela bung bilong Madang provinsei etministresen.

Bilong wanem tru na sistem bilong yumi bilong kalabusim olgeta manmeri kot i sasim ol long asua i bin lus na dispela man i bin go aut long Madang Beon haus kalabus.

Dispela wok painimaut em polis long Madang i go pas long em. Long wankain taim Bosman bilong ol Kalabus, Komisina Richard Sikani tu i go het long wanpela wok painimaut insait long sistem em i bosim.

Dispela olgeta samting nau i mekim ol Madang pipel i tingting planti long lukaut bilong provins bilong ol i mas kila kwiktaim.

Minista bilong Inta Gavman Risesens, Sir Peter Barter i autim pinis tingting bilong em long kism bek wok bilong lukautim Madang. Planti insait long kantri ting em bai inap mekim gutpela wok bilong provins bilong em.

Long dispela wik, opis bilong Sir Peter i bin givim bikpela tok kila long sindaun bilong Madang provinsei etministresen na sindaun bilong Rijnel Sit na memba bilong Madang husat i stap long kalabus nau.

Olgeta dispela tok kila, bai i mas stap insait long het bilong wan wan Madang manmeri na lida husat i gat tingting long bihain taim bilong provins.

Luksave i mas i go long Sir Peter long ol dispela tok kila.

Long wankain taim, mipela i singaut long polis na Koreksen Sevis wantaim i mas painimaut husat tru i stap long as bilong ol i lusim bipo gavana bilong Madang i stap kalabus James Yali i go aut long sindaun long wanpela kibung.

Bekim i kam long planti manmeri long pablik em i kila. Olsem wanem? I gat wanpela lo bilong ol lida na wanpela bilong ol gras ruts?

Man husat i mekim asua bilong pasin reip, i mas kism mekimsave. Sapos lida i mekim dispela pasin nogut, em i no lida moa. Em i wanpela stil man na man nogut husat i noken i gat nem insait long PNG politiks.

Tete, bai kot i tokaut long mekimsave bilong Mista Yali. Wanem kain tingting kot i givim, em i mas tingim ol dispela samting:

Maski i nogat evidens long turangu meri em i reipim i kism bagarap. Bagarapim i ken kamap long kain kain rot, i no long skin bilong meri tasol. Dispela kain pasin i save givim bikpela hevi long tingting bilong ol lain turangu i karim dispela hevi.

I nogat malolo long mekimsave ol reipis o man nogut i save reip i mas kism.

**WANTOK**

Published Weekly, Thursday, for Word Publishing Company, Ltd.  
P.O. Box 1982, Boroko, NCD  
Papua New Guinea  
Telephone: (675) 325 2500  
Fax: (675) 325 2579  
Email: editorial@wantok.com.pg  
Pe bilong wanpela yia  
52 niuspepa

Ples: PNG Air: K220.00  
AUSTRALIA US\$110.00  
ASIA PACIFIC na JAPAN US\$150.00  
AMERICA na EUROPE US\$210.00

A/General Manager  
Elizabeth Konga

Editor  
Neville Choi

Published at  
Section 58, Allotment 3  
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



**NCD bai gat Gavana o nogat?**

NESENEL Kapitela Distrik (NCD) bai gat gavana long 2007 o nogat?

Olgeta arapela provins insait long Papua Niugini i ron aninit long nupela Ogenik Lo we i gat gavana bilong provins na ol Lokol Level Gavman Kaunsil. Tasol NCD em mas wanpela spesel provins na em i nogat yet.

Taim nesanel ileksen i kamap, olgeta pipel i save makim vot bilong ol na ol i save makim rijinel memba we em bai kamap gavana bilong provins. Olgeta pipel i save long dispela taim ol i makim vot bilong ol. Olsem na i nogat narakain as long NCD long bihainim olsem.

Em i tru NCD i wok long bihainim yet olpela lo tasol wanem samting tru i mekim NCD i spesol o narakain long ol arapela provins we em i no kam aninit long nupela Ogenik Lo na gat Gavana na ol LGG?



Olpela rijinel memba Sir William Bill Skate i bin wok hat tru long traim kamapim dispela senis tasol i luk olsem bikpela pawa tru i stap long gavman long oraitim o holim bek. Sampela bikpela samting i mas krangi olsem na ol i traim long kism i go long kot long kot i skelim lo i banisim dispela. Tasol dispela kot i no inap kamap bikos man i go pas long dispela kot i dai pinis. Olsem na NCD bai i stap wankain yet.

Long dispela as, moabeta ilektorel Komisina wantaim Nesanel Gavman i tokaut sapos bai i nogat Gavana bilong NCD long 2007 nesanel ileksen. Olsem bai ol pipel bilong NCD i noken tromoi nat-

ing vot bilong ol long makim rijinel memba bilong NCD. Bikos sapos ol pipel i makim rijinel memba bilong NCD, bai em i no inap win na kism sia bilong em stret we ol pipel i makim em long kism. Em bai bilasim tasol palamen na bihainim lek bilong ol pawa lain tasol i stap. Na wok tru bilong gavana bai i nogat.

NCD i mas wanpela spesel provins tu bikos gavman i no hariap long stretim lo bilong en long mekim em kamap olsem ol arapela provins na i gat gavana. Long dispela as tu ol LLG i nogat na ol pipel bilong Motu Koitabu na ol pipel bilong wan wan wod insait long Mosbi siti i nogat trupela mausman long NCDC. Gavman i makim ol siaman na komiti tasol. Na ol pipel i no makim wanpela mausman bilong ol long NCDC.

Nau planti kendidet bai laik traim sia bilong NCD rijinel

long 2007 nesanel ileksen tasol bikpela samting nau em ol i mas kism kila tingting na save pastaim sapos ol i win bai ol i mekim wankain wok tru long palamen. Nogut ol i win na i go na traim toktok planti na pulim taitim i go i kam na pawa bilong sampela lain bai daunim ol tru na mekim ol i sindaun na raun wantaim wari na bungim bikpela hevi na bagarap long bodi bilong ol.

Ol pipel bilong NCD i gat rait nau long save long dispela samting sapos bai kamap o nogat long taim 2007 nesanel ileksen i kamap.

Sapos NCD bai nogat gavana long 2007 na i go, orait moabeta opim narapela ilektorel bilong ol brata susa bilong yumi long Motu Koitabu.

Gavman i mas tokaut nau na mekim kila long moa long 300,000 pipel bilong Nesanel Kapitela Distrik.

**Marit i stap long wankain mak**

LONG kastom bilong yumi PNG, ol meri i mas i stap aninit long man bilong em.

Na tu ol meri i no inap long kism wanpela wok i antap long ol man. Wok olsem; Meri i no inap i stap olsem het bilong ol famili, meri i no inap kism wanpela lida wok bilong sios na gavman. Nogat tru.

Long Efesus 5:21-33 - Pol i tok long pasin bilong marit. Efesus 5:31 Pol i tok; Tupela i kamap wanpela, na taim man i askim meri long wanpela samting meri i noken pasim. Na meri i askim man long wanpela samting meri i noken pasim. Long Efesus 5:22-23a na 33b Pol i tok; Meri i mas i stap aninit long man bilong em, na man em het bilong famili. Dispela hap tok i bihainim lo bilong yumi PNG, meri i mas i stap aninit long man bilong em. Tasol harim gut! Pol em i man bilong graun em i wankain olsem yumi. Nau bai yumi tok wanem! Long tingting bilong Pol na long tingting na kastom bilong PNG? Bilong wanem bai man i stap het bilong famili na bosim olgeta



samting na ol meri bai i stap aninit long ol man? Nau yumi Kristen bai gat bikpela salens tru. Long kristen bilip bilong mi, em i olsem.

Tupela man na meri i mas wok wankain na tupela i mas wok level. Wanem kain wok ol man i wokim, ol meri tu i mas mekim. Bilong wanem? Stat 2:21-23 God i bin wokim man na mekim em i slip na God i rausim bun bilong banis bilong man na wokim meri.

Sapos God rausim bun long het, orait meri bai i stap het bilong famili. Na Sapos God i rausim bun long lek, orait man bai stap het bilong famili. Yumi mas skelim gut dispela hap bilong Baibel. Na God i no longlong na em i bin rausim bun long namel.

Sapos God i rausim bun long het o lek, bai wanpela bai

lukdaun long arapela olsem na God i rausim bun long namel bilong mekim tupela i mas i stap wankain na mekim wankain wok.

Efesus 5:25-30 Long pasin kristen, yu mas skelim wok wantaim. Taim God i wokim namba 2 man em i meri, na meri God i yusim bun bilong man. Stat 2:22-23 Taim God i pinisim man na pulim em i kam long namba wan man. Taim em lukim namba 2 man, em tok dispela em i "proman bilong mi". Em i no tok dispela em i meri bilong mi. Gutpela pasin insait long marit, yu i mas rispektim narapela, narapela. Pasin bilong rispek o givim ona.

Man i noken kolim nem bilong meri bilong yu. Meri i noken kolim nem bilong man bilong yu. Ol pikinini i noken kolim nem bilong papamama bilong ol. Papamama i noken kolim nem bilong ol pikinini tu.

Sapos yu laik rispektim o onaim narapela, i gutpela long yusim sampela rot we i ken mekim yupela olgeta i wankain tasol. Sampela rot bilong kolim

nem; Man i kolim mama, misis, pren, wantok, adres bilong meri. Meri i kolim Papa, pren, wantok, mista, adres bilong man. Papamama tu mas yusim sampela we bilong kolim nem bilong ol pikinini we ol bai pilim amamas.

Tupela marit i save kolim stret nem bilong narapela, dispela i save bagarapim marit hariap. Rot bilong kolim nem ples kila i no rot bilong rispek, na laikim wanpela na narapela. Taim Jisas wantaim ol disaipol i bin wokabaut ol disaipol i save kolim em Tisa o Masta o Bikpela. Bilong wanem ol i bin rispektim Jisas olsem God tru na i man antap long ol.

Ol sik man o man i kam askim Jisas ol i no kolim em long nem Jisas, nogat. Ol i kolim Tisa o Masta o Bikpela o Pikinini bilong David. Bilong wanem ol i bin rispektim Jisas olsem Bikpela.

Tupela marit i mas wok wantaim tasol na narapela i noken lukluk daun long wok bilong narapela. Olgeta i mas wok wantaim na wok level i stret long olgeta marit laip bilong tupela. Bai God blesim dispela marit tru.

# Bird flu konfrens traim bungim wan bilien dola

WANPELA kibung bilong ol saveman we i kamap long biksiti bilong kantri Saina, Beijing i tok i gat nau bikpela nid tru long kwik taim bungim moni igo inap long wan-poinfoa bilien US dola, bilong pait agensim sik bet flu o pisin sik na rereim ol kantri long taim dispela sik nogut i kamap long ol.

Ol laik yusim dispela moni tu bilong apim helt na dokta sevis bilong ol enimal na apim tu wok bilong painim na save long bet flu namel long ol pisin na kakaruk insait long ol kantri i gat

dispela sik i stap long em pinis.

Ol saveman i pret olsem bet flu bai inap kamap strong na kisim planti manmeri na pikinini na bai kamapim wanpela bikpela sik hevi long wol.

Bet flu i kilim pinis 79 pipel long Esia rijen stat long 2003 yet na i kam. Mausman bilong Wol Helt Ogenaisesen (WHO), Ian Simpson, i tok dispela kibung long Beijing em i wanpela bikpela kibung tru.

"Em i bikpela tru long wanem i kamap klia nau olsem i gat planti wok yet long mekim insait long planti kantri long wol long rere

long bungim wanpela kain bikpela hevi olsem. Em i klia olsem em bai kamap. Mipela i no save wanem taim na mipela i no save em bai kam long we. Mipela i bilip olsem em i kam klostu long kamap wanpela pandemic nau na tok lukaut bilong nau i bikpela moa long ol yia i go pinis. Na wanpela long ol bikpela samting mipela i mas i gat em moni. Bikos sapos i nogat moni, bai ol kantri i no inap long mekim ol samting ol i mas mekim long rereim ol yet long kamap bilong dispela bikpela sik hevi na banisim ol yet. - **Radio Australia**

# Fiji militari komanda wanbel long i noken toktok agensim gavman

AMI komanda bilong Fiji husat i save tokaut planti i no laikim wok bilong gavman i wanbel long stopim ol toktok na salensim gavman bilong kantri.

Commodore Frank Bainimarama i bin wanbel long dispela long wanpela Imejensi Kibung em Ekting Presiden bilong Fiji i bin rereim na Praim Minista Laisenia Qarase i bin stap tu long en.

Niusman long Fiji, Samisoni Pareti i ripot olsem wanpela fo pes toktok bihainim ol toktok em Ratu Joni

Madraiwiwi i bin rereim i tok, Komodo Bainimarama na Praim Minister Qarase bai nau luksave long wok bilong ol yet long ol taim bihain.

Opis bilong Ratu Joni i bin autim dispela nius toktok bihain long Bainimarama na Qarase i bin wanbel long ol toktok insait long en.

Toktok bilong Presiden i tok, taim Komodo Bainimarama i wanbel long i noken mekim strongpela toktok i go long gavman long media, em i bin kisim tu gupela tingting

na luksave i kam long Praim Minista.

Ami Komanda bai nau i sidaun long Sekyuriti Kaunsil olsem wanpela obseva o bilong lukluk tasol na gavman bai glasim gut gen wari bilong em long Rekonsiliesen Bil na Vota Rejistresen em i pulim planti toktok kros pinis long en.

Stetmen i no bin toktok long Bainimarama toktok long rausim Deputi o namba tu bilong em, Colonel Jone Baledorkadroka long wik i go pinis.

- **Radio Australia**

# Fopela rebel opisel i ronawe long Filipins haus kalabus

LONG Filipins, foapela junia opisa husat i bin halivim long i go pait agensim Presiden Floria Arroyo long 2003 i ronawe long wanpela ami haus kalabus.

Dispela eskep o ronawe i kamap wanpela mun bihain long wanpela poro-

man bilong ol, Marine Captain Nicanor Faeldon, i bin ronowe taim i bin gat brek long kot keis bilong em.

Filipins Ministri i tokaut stret pinis olsem i bin gat eskep na i tok, ol ami sets tim o lain bilong painim man nogut na narapela

ausait i halivim ol nau i wok long olgeta hap bilong Manila, na i wok bung wantaim polis.

Mista Faeldon na ol foapela i eskep namel long sampela junia opisa husat i bin go pas long 300 man i go insait na tekova long wanpela haus slip em ol

diplometi i save stap long en long Manila fainensel distrik bilong Makati.

Long dispela taim, ol i bin mekim strongpela toktok i go long ol sinia ami opisa long korapsen na Presiden Arroyo long i no mekim samting long en.

- **Radio Australia**

# Australia jas bai go wok long PNG

ATONI Jenerel bilong Australia Philip Ruddock i bin paitim toktok wantaim ol opisel bilong Papua Niugini dispela wik long toktok sapos Australia i

ken salim sampela ol jas bilong em i go wok long Papua Niugini.

Mista Ruddock bai toktok wantaim Jastis Minista bilong Papua New


Guinea long bikpela ol as tingting long salim foapela jas bilong Australia long i go wok long Nesenel na Suprim kot bilong kantri.

- **Radio Australia**

## WOL NIUS




**DANIS BILONG MISIS BUSH:** OL DANIS lain bilong Afrika i soim stail bilong ol bilong meri bilong Presiden bilong Amerika, Lady Laura Bush taim em i bin kamap long Christianborg Kasel long Accra, Ghana. Meri bilong Presiden George Bush na pikinini meri bilong em Barbara na Presiden bilong Ghana, Presiden John Agyekum Kufuor i bin bung long dispela bikpela haus kasel we ol lain Swiden i bin sanapim long 1652 bipo long em i bin kamap as ples bilong gavman bilong Ghana. - **REUTERS**



**BANISIM OL TERORIS KALABUS MAN:** WANPELA ples bilong lukaut na was long ol lain kalabus i stap antap long han sut na daumbilo em ol wala banis we i bihainim wanpela longpela banis i brukim Guantanamo Bei Nevel Bes long kantri Cuba. Dispela haus kalabus em Amerika i bosim na ol i save salim ol teroris paitman i kam stap long dispela Kalabus - **REUTERS**



**HOLIM EM:** WANPELA man India i hangamap long baksait bilong wanpela bulmakau long makim taim bilong skulim ol wel bulmakau insait long liklik ples Palamedu. Dispela ples i stap 500 kilomita saut wes bilong sili Chennai long India. Dispela de em ol i save makim olgeta yia olsem hap bilong bikpela festival bilong ol India, ol i kolim Pongal. Ol manmeri i mas traim holim wanpela wel bulmakau pastaim long em i abrusim mak bilong 50 mita. - **REUTERS**



**PAINIM PLANET PLUTO:** ATLAS V roket wantaim New Horizons spes balus i sindaun redi long plai i go long spes. Ol i bin pasim ron bilong em pinis long wanem i bin i gat strongpela win i kamap. Dispela Atlas V roket bai plai i go olgeta long painim planet Pluto. - **REUTERS**



**DOK I KISIM BLESING:** WANPELA pater i blesim wanpela dok long taim bilong bikpela tumbuna kaikai o de bilong San Anton long siti Madrid long kantri Spein. Planti handret manmeri i save karim ol dok na pusi o ol arapela enimol ol i lukautim long kam kisim blesing olgeta yia long de bilong San Anton, Santu bilong ol Enimol long Spein. - **REUTERS**

# Viles Helt Volantia Progrem helpim komyuniti

....Sentrel Provinsel  
Gavman luksave

Veronica Hatutasi  
i raitim

**PLES Boregaina** long Rigo Distrik insait long Sentrel Provins i bin opim wanpela ples helt volantia progrem ol i kolim "Viles Helt Volantia progrem o VHVP) las wik Fraide.

Sentrel Provins Gavana Alphone Moroi, Provinsel Etrministreta Raphael Yibmaramba na ol opisa bilong ol, ol nius manmeri na Boregaina komyuniti wantaim tu ol woklain long Katolik Peris, Salvesen Ami lain, ol VHVP trena na sumatin bilong ol i bin stap long dispela lonsing bilong dispela gutpela komyuniti progrem we i sevim gut ol pipel long ol longwe ples wantaim ol nomol helt sevis i no inap long kisim ol. Bai yu kisim tupela awa long Mosbi siti i go long ples Boregaina.

Em i stap longwe, lusim Kwikila Stesen, insait long bikples bilong Rigo bihainim hap maunten eria. Tasol em i wanpela gutpela ples.

Wantok i bin stap long lonsing bilong progrem na ritim stori i sut long dispela daunbilo.

## Go painim Boregaina viles

De i bin gutpela tasol, bikpela san na blupela skai. Long 11 kilok moning, samting olsem 6-pela ka bilong Sentrel provinsel Gavman i gat long em Gavana Alphonse Moroi, Etrministreta Raphael Yibmaramba na ol arapela i gat ol opisa na ol ripota wantaim wanpela i karim ol baisikel na wanpela motobaik i ron bihainim Magi Haiwe.

Em i namba wan taim long sampela ripota i go olsem long Kwikila na ples Boregaina we wok mipela i go long em bai kamap. Ron i go long Boregaina i bin kisim tupela awa.

Long Bautama we plen i stap long wokim Sentrel Provins siti na hetkota, ol ka i stop long wetim olgeta narapela na bai mipela i bung wantaim na ron wantaim i go long dispela wokabaut i go long Boregaina.

Tripela haus i sanap pinis long Bautama. Ka we 4-pela ripota i sin-



**AMAMAS LONG LUKSAVE:** Katolik danis grup i welkamim ol deleget na tu amamas long helt volantia progrem long ples

daun long em i go insait long eria we i gat haus bilong Polis stesen na ol arapela kea teka o i lukautim ples i stap long en. Draiva i toktok wantaim ol, kisim sampela wara na go bek long bungim Gavana na ol arapela ka na mipela i statim gen ron long Magi Haiwe i go long Boregaina.

Mi save harim nem bilong dispela ples Boregaina olsem Katolik Sios i gat wanpela misin stesen long hap. Nau em i sans bilong mi long lukim ples.

## Bihainim Magi Haiwe

Magi Haiwe rot i gutpela. Em i gat kolta na nogat ol hul nabaut i stap. Ol ka i ron gut i go abrusim ol rot i go long ol Motu viles olsem Barakau, ples bilong biknem musik man Moses Tau na Loya Loani Henao, Ples Gaire we i no long taim i go pinis, wanpela bikpela seremoni long baim meri i bin kamap na wokim rekot long abrusim K150,000 mak. Long sampela hap, liklik lain setelmen haus i sanap na dispela i mak olsem ol setelmen long siti i wok long isi isi surik i go long ol ples bilong ol as ples pipel. Long hapsait rot long Gaire, sampela gutpela wok divelopmen i wok long kirap.

Ol i banisim hap eria

na ol i wok long sanapim wanpela ges haus projek i stap. Bikos taim bilong ren nau, ples i luknais na grin na win tu i nais na fres i nogat das na pipia bilong taun. Mipela i kamap long rot we i tanim i go long laspela Motu viles, Gabagaba long hansut, dispela i go stret em Hula rot na long hankais em i go long Kwikila. Ol ka i bihainim dispela rot i go.

Liklik taim tasol i go insait na mipela i stap long Gomore Ples na Praimeri skul. Bihainim snek rot, mipela i go pas long wanpela bikpela ples, Kwarimulubu. Wanpela sios i sanap long en na wanpela rot i go insait em long ples Kemaia we Fada Kanaga na katunis bilong Wantok Niuspapa, Jada Wilson i kam long em.

I go moa yet em Kwikila Stesen, hetkota bilong Rigo Distrik. Em i luk olsem ol gavman stesen we mani i sot na ol haus i laikim mentenens na apgretim wok, ol i mas katim gras na moa. i luk olsem long bipo taim, ples i mas naispela moa winim kain stap na lukluk mipela i lukim nau. Maket ples i gat planti pipel, meri na pikinini i wokim maket i stap. Em i klinpela maket. Ol ka i stop long hap, baim ol buai na kaikai long ol dispela i hangre na

mipela i go het long wokabaut. Neks ples em bikpela ples we yu ken lukim planti bikpela haus kapa long en. Em ples Saroa. Antap long hil o maunten, wanpela bikpela haus olsem pales i sanap long em. Em haus bilong wanpela bikman pablik sevan, Makena Geno.

Mipela i abrusim tu wanpela bris long wanpela bikpela wara we i save kam long maunten na i go olgeta long Kalo na ol nambis ples i go long solwara.

Rot i gutpela na i gat kolta. Long wanpela liklik haprot tasol em ol i no putim kolta yet long em. Lusim ples ya i go na mipela i kalap long sait rot lusim mein rot. Dispela em rot i go long ol bikples olsem Boku, Boregaina na sampela ples long inlen Rigo.

Rot i go liklik nau na long sampela hap, i gat ol bikpela hul na wara. Rot i laikim mentenens. Grup bilong mipela i ron long Toyota na mipela i orait. Mi wari long tripela ripota i sindaun long baksait taim ka i abrusim hap i gat ol wara long pothul tasol ol i tok ol i orait.

i gutpela long lukim ol bus, diwai na wara long dispela ples. Long wanpela hap maunten, yu ken lukluk daun i go longwe long ol veli na ples na i luknais moa. Ren i wokim na sampela eria i gat bikpela



**GAVANA NA DELEGET:** Sentrel Provins Gavana Alphonse Moroi (namba tu wantaim flawa) na lain long etministresen bilong em i kisim gutpela welkam long Boregaina.



**REDI LONG WOK TASOL LAIKIM HELPIM:** Sampela ol yangpela voluntia i wokim kos na ol trena long taim bilong VHVP lons.

wara (flood) i karamapim ol gaden kaikai na bus. Mi hop olsem taim bilong kambek, bai bikpela wara i noken pasim mipela.

## Bikpela welkam

Bihain long tupela awa, mipela i kamap long ples Boregaina. Ol pipel i bung na singsing grup i stap redi. Ol ka i stop na mipela i kamaut. Ol pipel i bin wet longpela taim bikos ol bin makim taim bilong progrem i stat long 10 kilok moning.

Ples i klinpela, gutpela win i klinpela na yu ken smelim win bilong bus na diwai na pilim gut. Ples i gat skul, ol

haus, haus lotu, haus pater, haus Sister, haus seminari na ol arapela sios woklain. Katolik Sios i lukautim dispela misin stesen na Holi Trinita Peris, Boregaina. Dispela em wanpela Katolik Sios peria insait long eria bilong Salvesen Ami na Yunaitet Sios na Seven De Etventis. Tasol ol sios ya i wok gut wantaim long sevim ol pipel i stap long ol longwe rurel eria.

Progrem i stat kwik. Ol komyuniti, ples na sios lida i welkamim Gavana na Etrministreta na lain bilong ol na putim ol lei plawa long nek bilong ol.

Na Katolik Sios singsing grup i kisim ol bik-

man i go long eria we lonsing o opening bilong VHVP progrem i kamap long en.

Ol ripota i kisim ol potu na bihainim grup i go. Taim ol yut bilong Salvesen Ami i pilaim singsing, ol ges i dring kodi.

21 yangpela i wokim VHVP na 6-pela trena bilong ol we Sista Bieb Singut i go pas long ol i sindaun redi pinis. Na gavana Moroi, Etrministreta Yibmaramba na ol bikman bilong Sentrel Provinsel Gavman na ol arapela ges wantaim i sindaun long ol sia long skruim progrem. Taim i abrusim pinis tu kilok apinun.

moa long pes 18

# VHVP program helpim pipel




**KIRAPIM PROGRAM:** Filipino Karitas Sister Felicitas Valentino na Leonor Djan wantaim Peris Pris, Pater Bobby Cue i givim bikpela sapot long VHVP program.



**BAISIKEL LONG HELPIM WOK:** Gavana Moroi i prisenim wilwil i go long wanpela voluntia long taim bilong lons. 21 wilwil i bin go aut long ol voluntia na trena.



**KOMYUNITI LAIKIM OL:** Ol yangpela meri voluntia i sindaun harim gut ol toktok bilong ol bikman i stap.



**HELPIM SIKMAN:** Pilai drama long soim wok ol voluntia i lainim na karimaut.

### I kam long pes 17

#### Stori bilong Boregaina

Nicholas Bora i makim Katolik Sios i wokim welkam toktok na givim liklik stori bilong program taim Sister Leonor Djan em Kanossa Kongriksen husat wantaim ol arapela wanlain bilong em na Pater Bobby Cue i lukautim Boregaina Peris i stap i bin givim histri long wok bilong ol na rot we VHVP i kirap na wok i stap.

Komyuniti lida i makim tu Salvesen Ami, em Vana Gabi taim em i autim tok amamas na tenkyu long Katolik Sios na Sentrel Provinsel Gavman long kirapim dispela program long kain longwe ples olsem, em bin askim Gavana sapos em i ken helpim long apgretim rot bikos dispela em i bikpela samting long kisim helt, edukesen na ol arapela gavman semis i go long ol pipel.

"Dispela VHVP bai stap stret wantaim ol pipel long ples na bai go het sapos ol i sapotim wantaim mani na gutpela rot. Ol pipel i luksave long bikpela na gutpela bilong program tasol gavman na ol arapela lain i laik helpim i mas skruim sapot. Mipela i tok tenkyu long Gavana long luksave, helpim na sapot bilong em," Mista Gabi i tok.

"Wara saplai sistem long Praimeri skul em ol i mas apgretim, spot pilai i laikim sapot na mipela i askim Gavana long helpim mipela wantaim sampela mani long apgretim pilai fil wantaim tu rot i bikpela samting," Mista Gabi i tok.

Mista Bora i makim maus bilong Boregaina Katolik Peris i bin sapotim ol toktok bilong Mista Gabi na tok VHVP program i kisim sevis i go long ol longwe ples lain. Na taim em i luksave long

helpim Gavana Moroi na gavman bilong em i givim, em i strongim gem mani helpim long gavman na Helt Dipatmen.

"VHVP i helpim tru ol pipel long ol longwe ples taim em i kisim semis i go long haus dua bilong ol. Stopim sik bipo em i kamap i moa gutpela (Prevention is Better). Na VHVP i traim long wokim dispela na kisim helt sevis long pipel. Program ya em i bikpela samting bikos em i sapotim helt sevis i go long ol pipel na spiritual laip bilong pipel," Mista Bora i tok.

#### Stori bilong VHVP

Sister Leonor Djan i tok ol i kirapim bek dispela program we ol bin statim moa long 10 yias i go pinis long 1994 long sampela setelmen na ples tasol i stop bikos long nogat gutpela mani na komyuniti sapot.

Em i tok long raun na wok bilong ol insait long ol setelmen na ples, grup bilong en em long 5-pela Kanosa Sista i bin lukim olsem ol i laikim ol Viles Helt voluntia long helpim i no ol siklain tasol ol arapela eria we pipel i laikim helt sevis. Na taim ol i toktok wantaim ol komyuniti, ol bin laikim tru ol ples helt voluntia.

Em i tok taim ol i kisim sampela mani long kongriksen bilong ol las yia, ol bin toktok wantaim Dipatmen bilong Helt na eria we i lukautim Viles Helt Voluntia program. Na bikos Boregaina em i hap bilong Sentrel provins, ol bin askim Sentel provinsel Helt opis long helpim ol wantaim ol trena.

Nau Sister Bieb na Bruder Alois Bayak bilong Sen Theresas Klinik wantaim 6-pela trena i ranim trening program long 19 yangpela pipel bilong 9-pela ples long Kwikila na Boregaina eria.

Em long Kwikila, Gamogagalo, Boregaina, Daruakomana, Seba, Galeba, Diguarobo, Dorun na Taukomana. Trening i bin stat long las yia Julai long Holi Trinita Peris Boregaina inap long mun Septemba. Taim namba wan hap long trening i pinis.

Sister Leonor i tok bihain long dispela, ol i salim ol voluntia long karimaut wok we ol bin lainim long em.

"Nau ol i stap long namba tu hap bilong trening na go hetim ol samting we ol bin lainim long trening skul bilong ol. Ol i wok long ol ples bilong ol na Sister Bieb i wok long glasim ol wok bilong ol.

"Komyuniti i amamas olsem Sentrel Provinsel Helt opis i wok long lukautim dispela grup tasol bai mipela i go het long givim spiritual sapot long ol," Sister i tok.

Em bin tok tenkyu long pastaim peris pris, pater Nads na ol lain Sister husat i bin givim bikpela sapot long kirapim program, long namba wan VHVP grup long givim taim bilong ol long sindaun long trening bilong helpim pipel bilong ol, Marieta Tovakuta long helt Dipatmen long helpim ol wantaim ol trening metrial na sapot, Sister Bieb na lain long Sentrel Provins helt opis na ol arapela moa. Na Bikman Antap long helpim ol i luksave long driman we i kamap tru na karim kaikai.

"Plis pre olsem dispela program i gro na go long moa ples insait long distrik na i ken helpim ol pipel," Sister Leonor i tok.

Etministreta Yibmaramba i tok gavman bilong em bai i katim sampela mani long 2006 baset bilong helpim VHVP program.

Na em i bin tok amamas long ol yut bilong dispela eria long sapotim program.

#### Wok bilong ol helt voluntia

Wanpela long ol lain bin sindaun long program, Tau Komana, i tok ol i yusim pinis save ol i kisim long trening bilong helpim ol pipel long ol ples longwe na tupela em long helpim wanpela mama i karim bebi na i lusim blut. Narapela em long givim banis sut.

Bikpela samting em bin putim long ol Sentrel Provinsel Etministresen na Gavana em long stretim rot.

Gavana Moroi taim em i amamas long VHVP program na ol Kanosa Sister long kirapim program i tok em i laik lukim dispela program i wok gut na go het. Na em i tok gavman bilong em bai sapotim VHVP program wantaim mani na olsem; baset bilong Sentrel Provinsel gavman i no pinis yet.

Long pinis bilong program, ol voluntia i bin kisim wan wan baisikel taim bosman bilong ol husat i bilong longwe ples stret i kisim wanpela motobaik.

Man! Ol lain ya i bin amamas nogut tru long helpim we Gavana Moroi na kain Etministresen i givim i go long ol na tok dispela bai mekim wok bilong ol i go long ol longwe ples i kamap moa isi.

Pe bilong 21 baisikel i moa long K3,000 long Papindo na pe bilong motobaik em K12,474.

Dispela kain program i gutpela tru bikos bai em i helpim tru ol pipel we ol helt woka ino inap long go long ol.

Nau, ol i mas traim long kamapim network namel long ol helt lain na VHVP na program i ken go gut long helpim ol liklik pipel long ol ples longwe na ol setelmen.

Graduesen bilong ol dispela VHVP bai kamap long mun Julai, bihain long wanpela yia trening.



# Lokol musik industri i go strong nau

**E**M i gutpela nius tru bilong ol songraita na rekoding atis bilong yumi olsem ol bai gat moa luksave insait long PNG musik industri bihain long ol paitim toktok mipela i mekim.

Antap long ol dispela nupela gutpela samting, i gutpela Gavman i givim gutpela bekim long tok klia insait long ol niuspepa long ol kain kain lo i stap aninit long Kopirait na neibaring Raits Ekt 2000, menesmen o lukautim bilong ol dispela lo na bikpela hevi bilong pairasi.

## CHM mekim gutpela wok

CHM Supersounds, namba wan bikpela musik bisnis i wok long mekim gutpela wok tu wantaim ol tok klia na toksave bilong ol long ol kain kain projek em i wok long go het na mekim bilong lukautim sindaun bilong ol atis bilong bihain taim.

Ekting Rejistra bilong Inteleksuel Propeti Opis, David Kil, i tok klia long wanpela ful pes Pablik Notis toksave insait long ol niuspepa olsem wok bilong opis bilong en em long lukautim na strongim Kopirait Lo.

IOPNG i stap insait long Invesmen Promosen Atoriti we ol i save bosim etministresen na wok bilong ol Kopirait Lo i go long Dipatmen bilong Tred na Industri.

Mista Kil i givim luksave long sampela hevi mipela i paitim tok long en we i karamapim baim bilong ol royalti, sanapim ol kolektng sosaiti, trening na i sapatim singaut bilong mipela long sanapim wanpela musik sosaiti.

"Insait long PNG, i gat bikpela nid bilong wanpela kolektng sosaiti i mas kamap," Mista Kil i tok.

"Dispela em bikos planti long ol papa bilong ol kopirait i nogat rot na i stap long kain kain hap bilong kantri na dispela i save mekim hat tru bilong ol long strongim ol rait na kisim gutpela pe bilong wok bilong ol."

Mista Kil i tok klia olsem kopirait em i wanpela praivet rait o rait bilong wan wan manmeri aninit long lo we husat manmeri i kamapim wanpela samting em yet i gat.

Wok ya i kisim banis taim em i kamap na ol i rekodim, ol i droim o raitim.

"Papa bilong kopirait long wanpela wok i gat rait long kopim o mekim kopi long en, komyuniketim (olsem brotkas o salim long email) na nensisim na soim long ai bilong pablik," Mista Kil i tok.

## Gavman i gat wankain luksave

Dispela mausman bilong gavman i tok klia tu olsem IOPNG i luksave olsem i mas i gat wanpela asosiesen i kamap na i pinisim pinis wanpela Kolektiv Menesmen Regulesen bihainim Seksen 33 bilong Inteleksuel na Propeti Raits Ekt.

Em i makim tu ol gaitlain o stia na rot bilong stiaim sanapim na wok bilong ol kolektng sosaiti.

"Dispela yia, mipela i laik tilim aut ol kopi bilong Regulesen o lo i go long olgeta stekholda oge-



naisesen, ol bikpela manmeri insait long kopirait industri na ol arapela manmeri bilong pablik bai ol i ken givim tingting bilong ol pastaim long em i go long Nesene! Eksektyiv Kaunsil (NEC) bilong kisim tok orait."

Ol toktok na tingting long kopirait lo, hevi bilong pairasi em mi bin toktok long en pinis insait long dispela stori kona bilong mi na long ol arapela stori mi raitim long ol yia i go pinis taim mi bin toktok wantaim Rejistra Mista Gai Araga na sampela loya man.

Gavman i toktok pinis, orait. Olsem wanem long ol lain insait long industri yet? Ol i wok long mekim wok long kirapim sampela wok aninit long Kopirait Lo o nogat?

I gat wanpela grup long ol wan wan manmeri husat i gat tingting long karim ol dispela paitim toktok i go het na long tupela mun i go pinis, ol i laik makim rot bilong sanapim wanpela kolektiv sosaiti bilong ol musik atis.

## CHM go pas long strongim musik industri

CHM Supersound i givim tingting bilong em pinis long dispela samting wantaim toksave olsem em i wok long go het pinis wantaim dispela samting we ol i statim ol projek we bai i helpim ol songraita na musik atis.

Toksave bilong CHM i mas salim klia hanmak long bilip ol i gat long ol musik atis husat i wok long krai strong tru long planti krismas pinis long dispela kain luksave insait long industri.

Toksave i kam long ol loya bilong ol - MS Wagambie Laywers - Chin H Meen i tokim mi olsem em i go het pinis long kamapim wanpela asosiesen bilong:

- Banisim na lukautim ol raits bilong ol PNG atis;
- Skulim ol musik atis long ol rait bilong ol bihainim kopirait na royalti;
- Banisim ol atis agensim pasin pairasi long musik bilong ol long ol kaset na CD;
- Skulim ol musik studio bosman long ol kopirait lo na wok bilong en;
- Go pas olsem wanpela rot bilong kamapim ol woksop na skulim bilong ol Atis long lainim ol nupela tingting bilong industri;
- Singautim ol intanesenel atis na saveman long kam long PNG long toktok long musik industri, em lokol na intanesenel, na givim tingting bilong ol; na



**PILAIM LAIP MUSIK:** Ol studio olsem CHM i tok ol i no save tambu long ol musik atis bilong ol long mekim bikos em i ken helpim sels bilong albam bilong ol atis.

• Kamap olsem wanpela rot bilong givim sans long ol atis long pafom o pilaim musik bilong ol insait long kantri na ausait wantaim.

CHM i tok dispela asosiesen ol i laik kirapim em ol i klostu rejistaim wantaim IPA na kampani yet bai givim moni long lukautim. Wok bilong rejistaim dispela asosiesen i bin stat long taim yet long banisim ol rait bilong ol atis.

Em i wanpela bikpela wok tru bilong CHM, tasol em i wanpela gutpela wok kamap we bai i lukim ol gutpela kaikai i go stret long ol songraita na rekoding atis.

Mi yet mi ken tok olsem CHM i bin bung wantaim wanpela mausman bilong APRA long mun Novemba 2004 na i kam inap nau, ol i wok long traim painim ol maket long Australia bilong distribut o salim ol PNG musik prodak.

Dispela wok nau bai strong moa taim CHM i kirapim bek websait bilong em long opim musik bilong ol PNG atis na salim.

## Na ol royalti peimen?

Glasm Musik i paitim bikpela toktok long ol musik pablisa i baim royalti long ol musik atis bihainim tasol sindaun bilong musik industri tete na ol bel hevi bilong ol musik atis husat i ting ol i no kisim inap pe long musik bilong ol we ol manmeri i wok long baim gut.

Ol musik atis i pilim olsem ol i no inap long sekim klia ol royalti peimen bilong ol wantaim ol sels namba long wanem ol i nogat rot long kisim o lukim dispela ol samting.

Long tingting bilong mi yet, dispela wok em i stap long han bilong pablisa na ol musik atis i mas paitim toktok long en wantaim ol pablisa yet.

Long bekim ol dispela toktok, CHM i bin tok klia long mak bilong ol royalti moni em i save givim long ol atis bilong em.

Ol loya bilong CHM i tok ol dispela toktok bilong mi i bin bagarapim CHM na mi 'no bin givim ol namba long strongim' toktok bilong mi na 'moni mak o ol royalti pesentes ol atis i wok long kisim i liklik na i no inap."

Em i tru, tasol bai mi kolim ol dispela moni mak o namba olsem wanem taim CHM yet i no givim ol namba long tok klia insait long media. Ol i tok tasol olsem em i wankain olsem olgeta arapela liklik kantri.

Mi no inap long autim ol dispela namba long wanem em i wok hait bilong bisnis aninit long lo.

## Ol musik atis mas stretim tok wantaim studio

Ol musik atis husat i wok long kam long mi na autim belwari bilong ol long ol i save kisim 50 toea royalti o liklik moa yet long wan wan yunit ol i salim i mas sindaun wantaim CHM na stretim olgeta dispela hevi bilong ol.

Ating wanpela rot bilong ol musik atis long givim luksave ong ol royalti bilong ol em long lainim moa long moni CHM i save tromoi long katim ol musik albam bilong ol.

Ol dispela kos em studio yet i save karim na em i gutpela wok bisnis long kisim bek olgeta moni yu tromoi pastaim long yu skelim ol winmoni.

Glasm Musik i givim luksave long planti ol studio long mekim dispela sakrifais. Em i tru, olsem CHM i tok we ol dispela hevi i stap hia long PNG tasol.

Long toktok bilong mi long Desemba 28 las yia, mi toktok long tupela biknem musik atis we CHM i bin laik rausim musik kontrak bilong ol long wanem ol i no harim tok bilong CHM na ol i bin pilai long SP Musik Awots las yia.

• CHM i save strongim laik

bilong ol musik atis long pilai long ol laip konset long promotim musik bilong ol na bai go het yet long strongim ol long wanem ol dispela kain konset i save strongim ol sels bilong ol albam bilong ol.

• Em bai mobeta bilong CHM na ol atis bilong em long pilaim ol laip konset," toksave i kam long ol loya bilong CHM i tok.

Ol i tok tu olsem sapos CHM i painim olsem ol laip pafomens bai no inap long strongim kampani na ol atis bilong em, em nau em i laik bilong CHM long stopim ol long pilai laip.

## Paitim tok i opim rot

I luk olsem bihain long olgeta dispela samting i kamap, PNG musik industri i wok long strong moa, na CHM i go pas long opim rot insait long intanesenel musik industri.

Dispela stori kona bai go het yet long sapatim na i tok sori long wanem toktok i kamap long en we i luk olsem em i bagarapim gutpela wok CHM i mekim bilong PNG musik.

Taim mi bin raitim ol toktok i kamap long Desemba 2004, ol dispela informesen na namba i no bin stap.

I no bin as tingting bilong mi long bagarapim nem bilong wanpela man o kampani.

Dispela stori kona bai wok klostu wantaim CHM an ol arapela studio long stretim sindaun bilong musik industri na ol musik atis long bihain taim.

\*\*Yu ken ritim ol stori bilong Musik olgeta Mande insait tasol long The National





**Bisnis bilong Groim Diwai insait long PNG - Planim diwai long ol renfores eria**

Rot bilong groim ol spisis diwai i save groa insait long PNG

## Gnetum gnemon (tulip)

Nem bilong en: tulip

**Ples we em i save groa:**

Gnetum i gat 28 spisis bilong ol tropikel lianas, i no tumas long ol diwai o bus. Gnetum gnemon i save groa long olgeta hap bilong PNG long ol ples daun insait long bus o long ol ples i we graun i no save holim tumas wara. Dispela spisis em ol i save groim klostu long ol viies o ples na long olpela gaden.

**Wanem kain diwai:**

Tulip em i wanpela liklik i go namel sais diwai we i save gro inap 25 mita, sampela taim namel bilong em inap gro inap 50cm. Bikpela namel bun bilong em i save gro i go antap olgeta long het bilong em. Ol liklik han diwai i save stap daun bilo. Ol lip i pat long namel na i go sap long maus bilong em. Ol flaua i save kamap olsem ol spaik, na kala bilong ol em yelo. Prut bilong em i ret o pepel.

**Rot bilong yusim:**

Ol i save groim tulip bilong prut na lip bilong em we ol i ken kaikai olsem kumu. Ol yangpela lip, em ol i save kukim olsem kumu. Insait skin diwai bilong em ol i save yusim bilong mekim rot bilong ol bilum, o bilong umben bilong holim ol pik, sikau na ol bendikut. Em i gutpela diwai bilong yusim olsem pos bilong haus.

**Taim bilong karim plaua:**

Em i save karim flaua bihainim wanem kain hap graun em i gro long en. Mau prut bilong en em i bun bilong ol muruk na arapela kain kain pisin.

**Bungim na prosesim ol sit:**

Taim namel long taim em i karim flaua na taim prut em i mau em i tripela mun. Yu ken kisim ol mau



Lip bilong tulip em i swit moa olsem wanpela kumu.



Plaua bilong tulip i stat long gro.

prut long diwai yet o long graun. Ol mau prut i save pundaun long graun we ol rat na bendikut i save kaikaim mit bilong em na larim ol pikinini diwai o sit tasol. Yu mas klinim wantaim han. Yu ken kukim na kaikaim mit bilong prut we yu rausim long pikinini i stap insait.

**Rot bilong groim insait long neseri:**

Yu ken yusim sit o pikinini bilong em long groim. Bai yu no inap hat wok long tritim sit pastaim long yu groim. Tasol planti i painimaut olsem sapos yu tritim sit pastaim long yu planim, em bai sotim taim bipo em stat long gro.

**Groim long han diwai:**

Yu ken yusim ol hap hap han diwai bilong em (ol kating) long groim.

**MCCARTHY & ASSOCIATES (FORESTRY) PTY. LTD.**

National & International Forest Consultants

mccaf@datec.net.pg

"Long kisim tok stia long olgeta wok diwai"

# PJV amamas long wok i kirap bek

**MENESMEN bilong Pogera Gol Main projek insait long Enga provins nau i salim tok-save i go long ol wokmanmeri bilong em olsem bai ol i no inap kisim mekimsave long straik ol i bin kamapim we i stat long wik i go pinis.**

Ol i toksave long ol wokmanmeri husat i bin lusim wok olsem ol i amamas tasol sapos wok i kirap na ron bek gen, na bai ol i no inap long givim mekimsave long ol wokman i bin lusim wok.

Ol wokman bilong Pogera Gol Projek i bin lusim wok bilong ol bihain long ol i harim olsem wanpela bikpela gol kampani bilong Kenada, Barrick Gold bai kam na tekova long kampani i lukautim hap menesmen bilong main, Placer Dome.

Jenerel Menesa bilong Pogera Main, Phil Stephenson i tokaut klia long dispela wik olsem wok i bin stop inap wanpela wik tasol nau ol i amamas long ol wokman i go bek long wok.

Ol wokman i bin wari olsem ol bai nogat wok taim dispela nupela kampani i kam insait long

projek.

Tasol Pogera Main menesmen yet i tokaut olsem dispela senis long kampani em i no long sait bilong moni o senisim wokman, na olgeta wokman bai holim wok bilong ol yet.

Long stat bilong dispela wik, sampela wokmanmeri husat i bin lusim wok bilong ol i bin askim long samting olsem K50,000 wan wan we kampani i mas baim ol pastaim long Barrick Gold i tekova.

Mista Stephenson i tok dispela askim em tru ol i bin kisim long sampela wokman, tasol menesmen i bin mekim klia long ol olsem dispela em i wanpela pablik kampani tekova, na olgeta wok i save kamap olgeta de bai no inap senis. Na maski sapos Barrick i win long senisim Placer Dome o nogat, ol wokmanmeri bai gat wok bilong ol yet insait long projek.

Bikpela tingting bilong menesmen bilong Pogera Join Vensa we Mista Stephenson i tok ol i bin lukluk long en, em sindaun bilong ol wokmanmeri.

"Namba wan bikpela prairiti bilong mipela bihain long straik i kamap, em sefti na sindaun bilong ol wokmanmeri bilong mipela. Dispela lukluk bai go het yet inap olgeta samting i stret gen. Bihain, mipela bai sindaun na skelim hevi dispela straik i kamapim long wok prodaksen na winmoni bilong mipela," Stephenson i tok.

Em i givim luksave long olgeta PJV wokmanmeri husat i bin go het long wok bilong ol na em i tok tenkyu long Nesenel Gavman na Royol Papua Niugini Konstabulari long kwiktaim go het long kamapim gutpela sindaun long main na ol ples i stap klostu.

"Gutpela wok bilong ol i opim rot bilong mipela long kirapim gutpela paitim tok wantaim ol wokmanmeri na dispela em mipela i amamas tru long en. Na long sait bilong mekimsave, bai i nogat. Sapos mipela i painimaut olsem ol wokmanmeri i bagarapim o brukim ol lo o polisi bilong kampani, bai mipela i skelim long bihain taim," Stephenson i tok.

## ICCC bai glasim ol nupela mobail telepon bisnis

**INDIPENDEN** Konsuma na Kompetisen Komisn (ICCC) ol lain husat i save makim prais bilong ol stua samting bai go pas long makim tupela nupela mobail kampani husat bai wok resis wantaim mobail kampani bilong Telikom PNG, Pasifik Mobail Komyunikesen Limitet (PMC).

Nesenel Gavman i givim tok orait long opim rot bilong tupela nupela mobail kampani long kam wok insait

long kantri.

Nau ICCC bai go pas long opim tenda bilong ol nupela mobail kampani we bai i go het long dispela yia yet i go inap mun Mas 2007 we ol bai ken kisim ol laisens bilong statim wok insait long kantri.

Bosman bilong ICCC Thomas Abe i tokaut olsem sapos i gat tupela moa mobail telepon kampani insait long kantri, bai ol pipel yet bai win we ol bai kisim mobeta mobail sevis, gutpela prais na bikpela

moa sevis i go aut long ol arapela hap bilong kantri.

"Dispela bai gutpela moa bikos ol netwok i stap nau bai ol i mas opim i go aut long ol arapela liklik ples insait long kantri," Komisina Abe i tok.


ICCC nau i wok long stretim ol tenda pepa ol bai givim aut long Mas 7, 2006 i go long ol telepon kampani ol i makim na ol bai askim ol long givim tenda long kisim wanpela long dispela tupela nupela mobail

laisens. Ol kampani bai i ken givim ol tenda long ICCC stat long mun Me. Bai i gat bikpela wok glasim long ol tenda na olgeta wok bai stap ples klia.

Bihain long en bai ol i kamap wantaim tupela kampani tasol we ol bai tokaut long mun Oktoba long dispela yia. Mista Abe i bilip strong olsem wok long ol netwok bai kirap long pisin bilong dispela yia, na ol bai stat wok long pinis bilong mun Mas 2007.

## Cat® 'C' Series Hydraulic Excavators

305C, 307C,  
308C, 311C,  
312C, 314C,  
315C, 318C,  
320C, 322C,  
325C, 330C



*Caterpillar® 'C' Series Hydraulic Excavators incorporates innovations for improved performance and versatility.*

- **Engines and Hydraulics** - Cat® engines combine with proven hydraulics to give consistently high power and control in the field.
- **Structures** - Rugged Caterpillar® undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

Hastings Deering



**PORT MORESBY**  
Spring Garden Road, Hohola, PNG  
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LIHRE	986 4105	986 4107
KIMBE	983 5144	983 5144

**Product People Commitment.**

**We deliver.**



Harim TOK PISIN long  
101.9FM  
Port Moresby

Tok Pisin Service  
6am - 7am  
5995; 6020; 9710; 1280(kHz)

radioaustralia.net.au

PACIFIC BEAT

# Greens pati laikim wok painimaut long ol Pasifik spai wok sut toktok

**NU SILAN Green Pati** i wok long singaut long wanpela wok painimaut i go insait long ol sut toktok olsem kantri bilong ol i wok long mekim spai wok long sampela arapela kantri, na tu sampela long ol wansolwara kantri bilong em insait long Pasifik.

Ol dispela sut toktok i bin stap insait long Komyunikesens Sekyuriti Buro enuel ripot long 1985 i go inap 1986.

Dispela rot i bin stap namel long ol arapela pepa bilong bipo Praim Minista bilong Nu Silan David Lange, husat i bin indai long las yia. Ol dispela pepa em Akaivis Dipatmen i bin kisim tok orait bilong autim i go long Sunday Star-Times niuspepa.

Ol dispela ripot i tokaut olsem Nu Silan i wok long mekim spai wok long Frens, Saina, Yunaitet Nesens na sampela Pasifik Ailan kantri tu.

**HUSAT I ASKIM:** Bruce Hill  
**HUSAT I BEKIM:** Keith Locke, Foren Afes Mausman, Nu Silan Green Pati.

**LOCKE:** Em nau, em i wanpela top sikret pepa ol i raitim long 1986 we i gat nem bilong ol kantri Nu Silan i wok long spai wok ol na tu ol i wok bung wantaim Amerika long spai wok ol, em ol i save yusim Tangimoana Redio Intelijens Stesen i stap long namel bilong Not Ailan na i soim tu olsem i bin i gat spai wok i kamap long ol Pasifik Ailan kantri olsem Tonga, Fiji na tu, Japan, Frens na long Yunaitet Nesens em yet tu.

Long sait bilong Pasifik, mi ting olsem mipela i mas tromoi ol dispela askim long wanem kain spai wok i kamap na sapos em i go het yet tude we em i ken kamapim hevi we mipela i wok long spai wok ol praivet komyunikesen o toktok bilong ol Pasifik Ailan lida na ol Pasifik Nesen yet.

Em i tingting bilong Green Pati olsem em bai bikipela hevi tru mipela bai karim na long wanem as tru mipela i mekim dispela pasin. Na yu ken kisim moa infomesen o stori sapos yu bihainim stretpepa rot bilong askim olsem ol niusman i tok, toktok wantaim ol bikman, ol kain wok we ol diplomet i save mekim long ai bilong pablik.

**HILL:** Em i wanem kain bikipela tokaut? Olgeta manmeri i save olsem ol

kantri i save spai wok ol arapela kantri.

**LOCKE:** Yes, tasol Nu Silan i wok long brukim wok bilong em olsem wanpela ikwel patna wantaim ol Pasifik Ailan nesen na long sanap olsem wanpela nuklia fri wokman bilong sanap namel insait long wol, na i no poroman tumaş wantaim ol bikipela pawa, olsem ol Yunaitet Stets long painimaut olsem mipela i wok long wok bung wantaim ol long spai wok ol arapela bikipela kantri olsem Frens na Japan. Em i samting bilong kirap nogut ya.

Em i nogut moa tude taim Nu Silan i laik strongim indipenden sanap bilong em long woa long Irak we em i bin wok bung moa wantaim Frens agensim Bush etministresen na em bai nogut tru sapos mipela i wok long bungim infomesen bilong Bush etministresen long karimaut woa bilong em long Irak na long wankain taim Nu Silan i bin tokaut agensim.

**HILL:** I gat sampela toktok insait long ol dispela pepa long wanem samting stret Nu Silan i wok long traim painimaut long ol Pasifik wansolwara bilong em, na wanem kain samting ol i wok long painim?

**LOCKE:** I no go insait tru. Em i bihainim sindaun bilong Cold War. Ating ol i wok long lukluk sapos i gat sampela koneksen, tasol long lukluk bilong mi i no go insait tumaş, tasol em i soim klia wokbung o wok wantaim namel long Nu Silan na Yunaitet Stets na kisim, glasim na salim i go bek long Amerika tu.

Em i narakain tru ol i wok long mekim dispela bihain long i bin i gat bikipela kros long 1985 long dispela nuklia samting, ol i bin tokim mipela bipo olsem olgeta wok intelijens i bin pinis na mipela i bin sanap nating tru. Tasol wanpela yia bihain, Nu Silan i wok long bosim yet dispela wok intelijens bilong US.

Wanpela hevi Green Party i lukim nau long foren polisi bilong Nu Silan em dispela moni i go kam namel long tupela kantri. Long wanpela sait, mipela i wok long soim wanpela indipenden sanap na tingting long ai bilong wol, olsem halivim long pis kiping wok, na i no ron i go stret long Irak...Mipela no bin go insait long

Irak wantaim Amerika.

Tasol long narapela sait, mipela i wok long gat han i go long Amerika o Washington na salim ol spesel foses i go long Afganistan o mekim wok intelijens operesen olsem dispela mipela i painimaut nau.

Mipela i ting olsem mipela i mas i gat strongpela moa foren polisi: i no bilong sanap na strongim wok bilong pis o bel isi, jastis na humen raitis long wol, tasol mipela i noken bagarapim sindaun bilong ol poroman bilong mipela na mipela noken sanap strong wantaim ol kantri husat i stap aninit long lukaut bilong ol kain man olsem George Bush husat i wok long suvim het long wol long traim daunim olgeta hevi long graun.

**HILL:** Nau i stap ples klia olsem dispela ol pepa i kamap long pablik, olsem Nu Silan i wok long spai wok ol Pasifik Ailan kantri tupela ten kribmas i go pinis, em bai bagarapim sindaun namel long Nu Silan na ol Pasifik kantri?

**LOCKE:** Ating em i ken kirapim sampela hevi.

Taim mi go raunim Pasifik long 2000 wantaim wanpela palamentari delegeesen mi save olsem namba tu bikman long Nu Kaledonia i bin hatim grup bilong mipela long Waihopai em mipela i wok long yusim long spai wok long Nu Kaledonia na ol dispela pepa i sapatim dispela samting i bin kamap.

Vanuatu tu i bin kros liklik long wok Waihopai i wok long mekim olsem wanpela hap insait long dispela netwok.

Olsem na i no inap halivim ol wok poroman bilong mipela insait long Pasifik, olsem na Greens Pati i wok long askim long wanpela wok painimaut. Bai i gat ol askim i kam long ol Pasifik Ailan kantri, i kam long Frens na i kam long Yunaitet Nesens.

Dispela i go het tude. Mipela i laik putim mipela long ples klia na wanpela rot long mekim dispela em long kamapim wanpela wok painimaut na mekim gut, tasol mipela i mas save long ol gaitlain Nu Silan i wok long bihainim insait long intelijens wol na givim sampela kain rot bilong pablik akauntabiliti na luksave long en.

RADIO TOK PISIN PROGRAM  
TUNE IN: 101.9 FM

Radio Australia Tok Pisin Program - stat long mun Mas 2005

<b>MANDE Morning</b>	6AM	Stesen Op - Nius Hetlain - Musik na ol intaviu
	6.30AM	Nius na Karent Afes
	7AM	Stesen Pas
<b>Nait</b>	7PM	Stesen Op
	7.01PM	Ol Hetlain na Program Priviu
	7.15PM	Spots
	7.30PM	Nius na Karent Afes
	8PM	Helt
	8.15PM	Musik
	8.30PM	NIUS
	8.40PM	Spots Riplei
	8.55PM	Musik
	9PM	Stesen Pas
<b>TUNDE Morning</b>	6AM	Stesen Op - Nius Hetlain - Musik na ol intaviu
	6.30AM	Nius na Karent Afes
	7AM	Stesen Pas
<b>Nait</b>	7PM	Stesen Op
	7.01PM	Ol Hetlain na Program Priviu
	7.15PM	Musik na Chit-Chat
	7.30PM	Nius na Karent Afes
	8PM	Mama Graun
	8.15PM	Musik/Spots
	8.30PM	NIUS
	8.40PM	Helt Riplei
	8.55PM	Musik
	9PM	Stesen Pas
<b>TRINDE Morning</b>	6AM	Stesen Op - Nius Hetlain - Musik na ol intaviu
	6.30AM	Nius na Karent Afes
	7AM	Stesen Pas
<b>Nait</b>	7PM	Stesen Op
	7.01PM	Ol Hetlain na Program Priviu
	7.15PM	Musik na Chit-Chat
	7.30PM	Nius na Karent Afes
	8PM	Focus
	8.15PM	Musik/Spots
	8.30PM	NIUS
	8.40PM	Mama Graun Riplei
	8.55PM	Musik
	9PM	Stesen Pas
<b>FONDE Morning</b>	6AM	Stesen Op - Nius Hetlain - Musik na ol intaviu
	6.30AM	Nius na Karent Afes
	7AM	Stesen Pas
<b>Nait</b>	7PM	Stesen Op
	7.01PM	Ol Hetlain na Program Priviu
	7.15PM	Musik na Chit-Chat
	7.30PM	Nius na Karent Afes
	8PM	Youth
	8.15PM	Musik/Spots
	8.30PM	NIUS
	8.40PM	Focus Riplei
	8.55PM	Musik
	9PM	Stesen Pas
<b>FRAIDE Morning</b>	6AM	Stesen Op - Nius Hetlain - Musik na ol intaviu
	6.30AM	Nius na Karent Afes
	7AM	Stesen Pas
<b>Nait</b>	7PM	Stesen Op
	7.01PM	Ol Hetlain na Program Priviu
	7.15PM	Musik na Chit-Chat
	7.30PM	Nius na Karent Afes
	8PM	Wantok
	8.15PM	Musik
	8.30PM	NIUS
	8.40PM	Youth Riplei
	8.55PM	Musik
	9PM	Stesen Pas
<b>SARERE</b>	Nait	
	7PM	Stesen op - Ol Nius Hetlain/Program Priviu
	7.05PM	Musik na Chit Chat
	7.30PM	Nius
	7.40PM	Wantok
	8PM	Lokal Ben
	8.30PM	Nius
	8.40PM	Musik/Chit Chat
	9PM	Stesen Pas
<b>SANDE</b>	Nait	
	7PM	Stesen op - Ol Nius Hetlain/Program Priviu
	7.05PM	Musik na Chit Chat
	7.30PM	Nius
	7.40PM	Femili Blong Serah (Redio Plei)
	8PM	Lukluk Bek Long Wik
	8.30PM	Nius
	8.40PM	Musik/Chit Chat
	9PM	Stesen Pas

**TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.**

## Pacific BEAT

Listen to Radio Australia  
101.9FM Port Moresby

4, 5, 6am & 4pm, 5pm  
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

**SOFBOL**  
**POT MOSBI MERI SOF-BOL**  
Sarere 21/01/06  
Bisini Daimon  
B Gret  
Daimon 3  
8:00 SP vs Airways Bears  
9:30 Gazelle v Chebu  
11:00 Ice Kopex v Bears  
12:30 SP v Tikana  
2:00 Kopex v Dolphins  
A Gret  
3:00 Wantok v Bears  
Daimon 2  
B Gret  
9:00 Wantok v Tikana  
11:00 Admiralty v Dolphins  
12:00 Wantok v Manalos  
2:00 Admiralty v Gazelle  
3:30 Chebu v Manalos

B Gret  
8:30 Freeway Rabbitohs v Hoks Magpies  
9:15 Kama Cowboys v MB Reds  
10:00 Toks Mix Dogs v Borderline Sharks  
10:45 Dorido Panthers v Figgy Dumpers  
11:30 Mutrus Brothers v Toks Warriors  
A Gret  
12:20 Freeway Rabbitohs v Hoks Magpies  
1:15 Kama Cowboys v MB Reds  
2:10 Toks Mix Dogs v Borderline Sharks  
3:05 Dorido Panthers v Figgy Dumpers  
4:00 Mutrus Brothers v Toks Warriors

Knights  
10:00 Taraga Dragons v Raiders Namona  
10:45 JV Bulldogs v 29 Dogs  
11:30 LB United v Toks Valley Eels  
A Gret  
12:20 Osi Osi Panther v Borderline Tigers  
1:15 SI Eagles v BP Knights  
2:10 Taraga Dragons v Raiders Namona  
3:05 JV Bulldogs v 29 Dogs  
4:00 LB United v Toks Valley Eels

2:30 P-Print vs BSP  
3:15 Courts vs Fairdeal  
Divisen 1 - Kot 3  
1:00 Datec 1 vs STC Fin  
1:45 OSL vs Pryde  
2:30 Theodist vs HDPNG  
3:15 NTIL vs SPB 1  
Divisen 2 - Kot 4  
1:00 GFI vs Lamana  
1:45 Pomtrans vs AHC  
2:30 CCA vs QBE  
3:15 Datec 2 vs ANZ  
Divisen 3 - Kot 5  
1:00 PWC vs B-Bros  
1:45 The National vs Kumul Hotels  
2:30 C-Bros vs WPC Askonce  
3:15 Brian Bell vs LBC  
Divisen 4 - Kot 6  
1:00 Meddent vs BSP 2  
1:45 Moore vs SPB 2  
2:30 PNGSF vs WPC


Bonusaver  
3:15 STC Shipp vs Andersons  
Divisen 5 - Kot 7  
1:00 Able vs Renos  
1:45 Mirupasi vs POSF  
2:30 C-21 Pac. Ind  
3:15 Fincorp vs Boroko Motors  
Divisen 6 - Kot 8  
1:00 RH H-Mart vs Ela Motors  
1:45 Johnstons vs Paraka  
2:30 Air Niugini vs STC Hardware  
3:15 Raywhite vs Bye-(Hertz)  
Divisen 7 - Kot 9  
1:00 DHL vs Cul. Delight  
1:45 Arnotts 1 vs Star Fish  
2:30 Pro-clean vs City Pharmacy  
3:15 P-Print 2 vs APNG

Divisen 8 - Kot 10  
1:00 Barlow vs Copytek  
1:45 AFL vs Yng & Williams  
2:30 STC Hotels vs B-Bros  
3:15 Nasfund vs Kassman  
Divisen 9 - Kot 11  
1:00 Global vs Veupunama 1  
1:45 Temis vs MRDC  
2:30 IPA vs Kenmore 2  
3:15 RH H-Mart 2 vs Deloitte  
Divisen 10 - Kot 12  
1:00 EFM vs Stop n Shop  
1:45 PDE vs Arnotts 2  
2:30 Sinton vs Veupunama 2  
3:15 Adsteam vs Bye (Indies)  
Please note that games will have a duration of 15 minutes each half


**RAGBI**  
**HOHOLA OV SISEN LIG**  
Sarere 21/01/06

Sande 22/01/06  
B Gret  
8:30 Osi Osi Panthers v Borderline Tigers  
9:15 Si Sea Eagles v BP

**NETBOL**  
**NCD PRAIVET KAMPANI NETBOL**  
RAUN 1 - GEM 7  
Primia Divisen - Kot 2  
1:00 Daltron vs Kenmore  
1:45 Brian Bell vs Kina



**TRIPLELA MASKETMAN:** Tripela PNG pilaia husat i stap long stap long EAP tim na pilai long Australia Kantri Kriket Sempionsip (ACCC) we i mekim gut na kisim luksave long ACCC long las wik em I-r batsman John Ovia, kepten Rarua Dikana na Ipi Morea. Sanap wantaim ol na welkamim ol wantaim PNG Kriket tim em PNG Kriket bod siaman Mick Nades.



**BRUKIM SOL:** Morata ov sisen ragbi lig namba tu Stet ov Orijin pilaia namel long Morata 1 Maroons na Morata 2 Blues we Blues i win 14-0 las wik.



**KISIM BAGARAP:** Morata 1 Maroons pilaia long Morata ov sisen ragbi lig Stet ov Orijin pilai husat i kisim bagarap klosut long fultaim las wik.



**TENK YU:** PNG Ragbi Yunion presiden Graham Osborne (sindaun rait han) i tok tenk yu na amamas wantaim PNG Ragbi 7s trening skwat long SP Bruwari long sponsaim wokabaut bilong ol i go long ragbi wol 7s tonamen long Wellington, Nu Silan long narapela wiken Fraide go wantaim K42,000 mani. Sindaun wantaim Osborne em SP Bruwari maketing menesa Albert Veratau.



**PUTIM MAK:** Sikspela pilaia long ol 9-pela PNG pilaia husat i stap long EAP tim we i winim Saut Australia na difening sempion Kwinslen long Australia Kantri Kriket Sempionsip las wik.



**BILONG MI:** Ol meri Daltron na BSP i resis long kisim bal long NCD Praivet Kampani netbol pilai long Pot Mosbi Rita Flynn Kot las Sande.

© 2005 NICKY BERNARD



**ROT PAS:** Morata 2 Blues hap bek na kepten Stanley Douglas na Nickson Nagle i banisim olgeta rot bilong dispela Morata 1 Maroons pilaia long namba tu Stet ov Orijin pilai long Kone Tigers ragbi lig graun las Sande. Blues winim dispela namba tu pilai gen na olsem ol i winim dispela 2006 pilai.



**NOKEN:** Benk ov Saut Pasifik Lydia Kaivo (GK) no laik bai Natalie Hegai bilong Daltron i skoa long taim bilong NCD Praivet Kampani netbol pilai long Rita Flynn Kot las Sande.



**KOAN:** Heni Vala bilong BNG Poreporena i laik mekimsave long birua pilaia long taim em i boul long Lamana Mariners long Pot Mosbi Kriket pilai long Amiri Pak las Sarere.



**BAI YU KISIM:** Relvie Tomaninana bilong SP i mekimsave long ol beta bilong Manalos long Pot Mosbi B Gret meri sofbol pilai long Bisini Daimon las Sarere.



**KLIA:** PNG Pawa senta i abrusim gut ol pilaia bilong Dipatmen bilong Praim Minista na Stet Entapraises long Pot Mosbi netbl pilaia long Rita Flynn Kot, las Sarere.



**LUSIM MII:** Si Sea Eagles pilaia i laik ronawe long ol wanpilaia bilong emtasol i tuk olsem ol Raiders Namona pilaia i holim pasim em pinis.

Oil Foto: ANDREW MOLENNI

Cottagers daunim Newcastle



MIPELA MEKIM: Newcastle straiika Shola Ameobi i amamas long em i skoaim gol bilong tim egensim ol Cottagers. Fullham Cottagers win 1-0.

**NEWCASTLE**, Inglan: Fullham bos Chris Coleman i bilip olsem win bilong ol egensim Newcastle long las Sarere i strongim tingting bilong ol long mekim gut long kisim ol i go antap long Barclays Primiasip poin lata.

Long ol 21 pilai bilong ol Cottages em i namba wan win bilong ol egensim ol Newcastle 1-0 we pastaim long dispela long wik i go pinis ol i nekim Sunderland 2-1.

Dispela sikspela poin i kisim ol i go antap long 12 ples long primiasip tebol bihain long planti pilaia bilong ol i kisim bagarap long bodi bilong ol na midfila bilong ol Papa Bouba Diop i lusim ol na go bek long Afrika long pilai long Afrika Nesen Kap.

Narapela pilai bilong ol i kam em egensim birua tim bilong ol London em West Ham.

Long dispela Coleman i tok em i laik lukim namba wan win bilong ol long tim i lusim pilai graun bilong ol na go pilai long narapela pilai graun em Upton Pak.

"Las wik mi bin wari long wanem mipela i bin gat planti ol pilaia husat i kisim bagarap we Leyton i rausim ol long FA Kap," Coleman i tok.

"Nau mipela i winim Newcastle we

mipela nogat ol gutpela pilaia bilong mipela i stap insait long pilai- na i gat sampela pilai husat i stap yet wantaim bagarap- tasol ol samting i luk gut long mipela."

"Newcastle i gat bikipela resis long tingting. Mipela i nogat ol win we i bihainim arapela long 21 pilai bilong mipela olgeta long dispela sisen na olsem long kain win i kamap i kamapim liklik rekot long mipela."

"Nau mipela bai go long West Ham we dispela bai i no inap isi na em bai gutpela moa sapos mipela i kamapim namba wan win longwe long ples bilong mipela. Tasol bikipela samting em long skruim yet dispela win bilong mipela."

"Em i fani sisen. Mi bin amamas long pilai bilong ol man. Planti taim mipela i save go pas long ol pilai inap long 10 i go inap long 15 minit i save lukim mipela i guria guria na lusim pilai bilong mipela."

"Mipela i luk strong long ol Newcastle na olsem i moa beta mipela i skruim yet dispela mak."

"Mipela i redi gut tru long hamarim ol Newcastle na olsem mipela i mas lukim moa dispela kain ol samting."

"Mipela i hop long mekim gut long dispela pilai na hap mak."

Prince amamas long stap wantaim West Tigers

**SIDNI**, Australia: West Tigers kepten Scott Prince i tok em i amamas long stap longpela taim wantaim ol Tigers.

Em i mekim dispela toktok long taim ol Tigers i redi long hotim Wol rugbi lig klab sempionsip wantaim Bradford Bulls long Inglan, Februari 3, 2006.

"Mi laik stretim sampela samting bipo long (2006) sisen i stat we dispela i no ken bilong mi tasol, em i mas bilong klab tu wantaim," Prince i tok. "Mi laik kisim ol i go moa yet."

"Sapos mi stap orait klab i save na olsem ol bai i no inap long lukluk nabaut. Na sapos mi go (nau) dispela bai givim ol inap taim long lukluk long narapela hap na kisim helpim."

"Mi laik stap wantaim klab nau olsem Benji Marshall i sain gen wantaim ol. Dispela i mekim olgeta samting i luk gut."

"West Tigers em i bikipela klab na olsem nau ol gutpela samting i wok long kam isi. Mi hop olsem mipela bai kamap wantaim samting we em i gutpela long tupela grup wantaim."

"Mi mas tokim poromeri bilong mi long dispela samting. Famili laip bilong yu i mekim bikipela samting long larim yu i mekim wanem samting em yu laik long mekim long wanwan wik."

"Sapos olgeta samting i ron gut long haus bilong yu, yu bai



MI LAIK STAP: West Tigers kepten Scott Prince bai stap gen long klab.

amamas na kamapim ol gutpela pilai na lukim gutpela yia."

Prince i tokaut long 2005 sisen olsem em i yia em i driman long kamap long em long ragbi lig pilai. Dispela i tukim em i go pas long ol West Tigers we ol i go insait long NRL gren fainol na winim na bihain em i winim ples na stap long Australia Kangaroo tim long pilai long Trai Nesen pilai egensim Nu Silan na Inglan.

"Winim kompetisen em bikipela tingting bilong tim na olsem dispela i bilong klab na olsem em i gutpela tu long mi stap olsem kepten bilong klab," Prince i tok.

"Long winim Clive Churchill medol olsem NRO pilaia bilong yia na long winim ples long

Australia Kangaroo tim i bikipela samting tru."

Na long West Tigers klab nius menesmen i makim pinis tim long pilai egensim Inglan Bradford Bulls long Inglan long Fbruari 3, 2006.

Tigers tim em Dean Collis, Shane Eford, Robbie Farah, Daniel Fitzhenry, Liam Fulton, Ben Galea, Keith Galloway, Bryce Gibbs, Sam Harris, Bronson Harrison, Chris Heightingon, Brett Hodgson, Anthony Laffranchi, Jamaal Lolesi, Shannon McDonnell, Ryan O'Harra, Todd Payten, Scott Prince, Ben Reynolds na Paul Whatuira.

Bipo long ol pilaim ol Bulls ol bai pilaiam sampela pilai pastaim long strongim ol yet.

Bryant Los Angeles Lakers abrusim Miami Heat


**LOS ANGELES**, Amerika: Pastaim long pilai i kamap Shaquille O'Neil bilong Miami na Kobe Bryant bilong Los Angeles Lakers i laikim samting ol i lakim long em.

Tasol bipo long pilai i kamap Lakers Bryant i helpim ol Laders long abrusim ol Heat long skoaim 100 basket na ol Heat i skoaim tasol 92 basket. Bryant i mekim gut long las 8 1/2 minit bipo long pilai i pinis taim em i kamapim 12 poin long 37 poin em i mekim olgeta long dispela pilai.

Dispela tupela biknem basketbol pilaia i save pilai wantaim long Lakers tim bipo.

"Mi ting dispela i gutpela," Bryant i tok long pilai bilong em long hap taim bilong pilai long taim em i kisim malolo. "Mipela i ken putim dispela ol samting bihain na go het long laip bilong mipela."

Dispela em i namba foa pilai



PASIN BRATA: Los Angeles Lakers Kobe Bryant na Miami Heat Shaquille O'Neil bipo long pilai bilong ol las Sande.

namel long tupela tim bihain long ol Lakers i salim O'Neil i go long ol Heat long 2004.

Long dispela foapela pilai ol

Heat i winim tripela bilong ol. Tupela pilaia i bin stap 8-pela sisen long Lakers tim wantaim kosa Phil Jackson we ol i winim tripela sempionsip.

Australia tenis sempionsip



KOAN: Maria Sharapova halim skin.

**MELBON**, Australia: Long taim we planti nupela samting i wok long kamap dispela i wankain long ol pilai na moa yet long tenis.

Nau yet ol pilaia i mekimsave long Australia Tenis Open.

Sampela biknem pilaia we ol man-meri i save bai win isi i lusim pilai bilong ol long ol liklik pilaia.

Wanpela bilong dispela em wanpela Amerika sista Venus Williams husat i lus long Bulgaria meri Tszvetana Pironkova husat i stap long 92 ples long wol renk 2-6, 6-0, 9-7. Venus i stap long 10 ples long

wol renk. Susa bilong em Serena Williams i winim Saina meri Li Na 63, 6-7, 6-2. Serena i difening sempion bihain long em i winim taitol las yia.

Ol narapela meri husat i winim pilai bilong ol em Lindsay Davenport, 2004 Wimbeldon sempion Maria Sharapova na Frans meri Justine Henin-Hardene.

Long pilai bilong ol man namba wan tenis man pilaia long wol Roger Federer i go yet gut long pilai bilong em. Em i winim narapela pilaia Denis Istomin 6-2, 6-3, 6-2.

Federer i mekim krangki long namba tu set tasol bihain i kirap gen na mekim gut long go moa na win.

Planti i lukim olsem Federer bai winim dispela taitol bilong Australia tenis open sempionsip.

"Em i no save isi long namba wan pilai bilong gren slem," Federer i tok. "Mi amamas tasol sapos mi win- em i gutpela stat." Istomin i bilong kantri Uzbekistan na i stap 195 long wol renk.

"Mi pilai gut nau tasol mi mekim planti ol asua we mi no mas mekim," Istomin i tok long pilai bilong em.

Dispela em i namba tu wokabaut bilong Federer bihain long em i lus long Masta Kap long Sangkai, Saina.

Sehwag/Dravid putim ol Pakistan pilaia long bainat

**LAHORE**, Pakistan: Opening betsmen bilong Ingia Virender Sehwag i hamarim ol fas bol long mekim tupela 100 long pilai bilong Mande egensim Paksitan.

Sehwag i no bin pundaun taim em i mekim 247 ran long 240 bal we long dispela em i paitim 46-pela foa na wanpela siks na poroman bilong em Dravid i mekim namba 21 ol 100 ran em i mekim long wanwan ol pilai. Long taim



EM TRU: Virender Sehwag na Rahul Dravid bilong India i amamas long gutpela pilai bilong ol ol i pilai wantaim Pakistan Dravid i

mekim 128 ran we bungim wantam tupela i mekim 403 ran olgeta.

Long dispela taim i nogat wanpela betsmen bilong ol i aut. Tupela i olsem ol opening betsmen.

Dispela bung bilong Sehwag na Dravid i namba wan gutpela bung long wanpela tim bilong India we i pilai egensim Pakistan long longpela taim nau.

Long pilai bilong ol dispela wik tupela i 10 ran sot long kamap long 413 histri ran yet.

SPOT RAUN

wantaim

SCOTT VAVINE



Ragbi lig pilaia dai- no gutpela stori

BAKSATI stori bilong Pos-Kuria Trinde Januari 11, 2006 i tok long tupela ragbi lig pilaia long Dei Kaunsel ples, Westen Hailans provins.

Dispela tupela pilaia em Neial Anda na Russell Steven husat stori i tok tupela i pinisim Gret 12 long Kitip Sekenderi Skul na i stap malolo na pilai ragbi lig taim tupela i bungim hevi bilong ol.

Anda i dai long taim em i pilai ragbi na Steven i dai bihain long em i painim aut long pulim win long sampela bagarap em i kisim long pilai. Tupela i bin go long Mt Hagen Hausik we tupela i dai.

Dokta bai painimaut long as bilong dai bilong ol bihain long sampela wok painimaut. Ol dokta i no inap klia long hevi bilong dai bilong tupela .

Long mipela dispela em i gutpela piksa long tokaut long yumi olsem mipela i mas redi gut bipo long mipela i holim ol pilai.

Mipela i no inap save long as bilong dai inap ol dokta i kamapim wantaim as bilong dai bilong tupela yangpela ragbi lig pilaia.

Tasol mipela i ken tok tu olsem dispela stori i gutpela piksa long tokim mipela olsem oltaim mipela i mas redi gut bipo long mipela i holim i pilai.

Long abrusim ol kain hevi olsem mi bin long pastaim kolum bilong i toktok long ol samting we ol oganaisa i mas i gat bipo long ol i go het long holim na kamapim ol pilai.

Sampela samting em mi tok long ol em ol oganaisa i mas:

- LUKSAVE long as tingting bilong kamapim dispela ol pilai;
• SAVE husat tru em pilai i kamap long ol. Oltaim ol pilai i kamap bilong olgeta manmeri long komuniti i kisim amamas long en. Ol pilai i no ken bilong wanpela o sampela lain tasol;
• SAVE sapos ol pilaia i strong long pilai. Dispela em ol kosa na bos bilong tim bilong ol i ken save;
• I mas i gat bokis bilong marasin;
• SAVE wanem wei em ol pilai bai kamap long en;
• SAVE hamas taim dispela ol pilai bai kamap (long ol de, wik o mun);
• SAVE long ples we ol pilai bai kamap long en;
• SAVE long husat bai helpim long ronim ol pilai, hamas mani yu mas i gat long en na ol samting em yu bai gat long en olsem bal, net na wisil samting;
• SAVE pilai bai helpim ol pipel olsem wanem;
• SAVE long rot bilong kisim ol samting na ronim ol pilai;
• SAVE sapos i gat sampela samting we i ken banisim gutpela ron bilong ol pilai o ken bagarapim na pasim ol pilai na
• SAVE wanem arapela hap moa long holim pilai sapos ren o sampela kain samting i kamap.

Ol manmeri i mas save long sampela samting olsem bipo long ol i go het na kamapim ol pilai.

Sapos ol i sindaun na skelim sampela bilong dispela ol askim mi bilip ol bai i no inap long bungim hevi taim ol i ronim ol pilai.

Sefti bilong ol pilaia o husat manmeri i kamap na i stap long ol pilai i bikpela samting long ol oganaisa bipo long ol i go het long holim ol pilai.

Sapos ol i no bihainim ol askim em mipela mekim ol bai skruim yet dispela ol asua na planti hevi moa bai kamap.

Vele Ejensi sponsaim Sentrel provins SP Kap tim

ragbi Paul Zuvani i raitim

BIKPELA lokol bisnis long Sentrel provins Wari Vele Ejensi i laik sponsaim wanpela SP Kap tim long 2006 sisen.

Long bung bilong ol nuis man long nau Vele bai tokaut long sponsiam Sentrel provins ragbi lig tim.

Nem bilong ol tim i no kamap klia yet we dispela em Vele bai tokaut long bung bilong tede.

Tasol ol toktok i kamap olsem dispela bisnisman bai kisim ol pilaia long Rigo Sentrel Ragbi lig, Rigo Kos ragbi lig na Aroma Kos ragbi lig long kamapim Vele Sentrel SP Kap tim.

Long Vele i sponsaim ragbi lig tim dispela i orait tu long

wanem long taim bilong Krismas ol oganaisa i save kamapim Sentrel 9's Salens we i lukim ol pilaia long ol Sentrel ragbi lig tim i save kamap na pilai egensim ol yet.

Solomon Ravu wanpela oganaisa bilong dispela salens i tok ol i kamapim dispela tonamen wantaim tupela as- long strongim ragbi lig pilai long Sentrel provins na long NCD wantaim na long mekim ol yangpela i amamas.

"Mipela i laik strongim gen ragbi lig pilai na promotim dispela pilai long Sentrel provins na olsem mipela i statim dispela tonamen," Solomon i tok long taim bilong Krismas.

Dispela tonamen i go insait long namba tri yia.

Sapos dispela kain mak i tru dispela i min olsem tingting bilong Vele long sponsaim tim

i gutpela bihain strong bilong pilai insait long provins.

Nau yet siaman bilong Papua Niugini Ragbi Futbol Lig Sir Bob Sinclair i go aut long kantri na olsem Wantok Spot i no inap long kisim ol tingting na toktok bilong em tasol ol toktok i kam long opis i tokaut olsem em i orait long Vele i ken sponsaim wanpela tim.

Dispela i kamap bihain long ol toktok i kamap olsem Pot Mosbi kampani Monier i no tingting moa long sponsaim Pot Mosbi SP Kap tim 1 Broncos.

Broncos husat i kamapim sampela ol gutpela pilai long las yia na i kamap namba foa ples long 2005 sisen bihain long wina Rabaul Agmark Guria, Pot Mosbi Brian Bell Bulldogs na Lae LBC

Bombers i gat gutpela sapot long ol manmeri i luk olsem bai i no inap kamap moa.

"Namba bilong ol SP Kap tim long 2006 bai stap yet olsem eit (8) na olsem sapos Vele i tingting long sponsaim tim em i orait," opis bilong PNGRFL i tok.

"Tasol i gat laik i kamap olsem long Waghi Tumbi tim long Minz (Westen Hailans) na tim bilong Kundiawa long kamap. Dispela em long 2007."

Nau yet ol narapela 7-pela SP Kap tim i stap yet. Dispela ol tim em Brian Bell Bulldog, LBC Bombers, Agmark Guria, Goroka Lahanis, Mt Hagen Chemica Cowboys, Wabag Toyota Mioks na Mendi Mabey Johnson Muruks.

Long 2007 i gat bilip olsem namba bilong tim bai go antap.

Nandoma, nupela Lae ragbi lig bos

ragbi Bustin Anzu i raitim

NUPELA presiden bilong Lae ragbi lig i tok i nogat taim bilong westim na lig bai mekim olgeta samting stret long statim sisen 2006 long gutpela pasin na rot bilong pilai.

Presiden Daniel Nandoma i mekim dispela toktok bihain long ol klab presiden i makim em olsem nupela presiden bilong Lae lig.

"Dispela yia em i wanpela strongpela yia bilong bod long wanem i gat planti wok long mekim long senisim pes bilong lig long Lae. Nem bilong Lae ragbi lig em ol i bagarapim pinis taim ol bosman i no ronim ples gut long 4 o 5-pela yia i go pinis, Nandoma i tok.

"Long sait bilong moni tu em planti kampani i les long sponsaim lig na ol manmeri tu i lusim Lae ragbi lig. Mipela 4-pela lain long bod bai traime long stretim dispela," em i mekim dispela toktok bihain long namba wan mingting bilong bod long las wik.

Em i tok ol bai senisim dispela na kisim bilip bilong ol manmeri long pilai i kam bek gen wantaim sapot bilong ol bisnis kampani long Lae.

Long wankain taim tu namba tu presiden na siaman bilong Lae Bombers Dean Sinclair i toksave tu olsem



EM NAU: Nupela Lae ragbi lig Daniel Nandoma (lep han) i sikan wantaim presiden bilong PNG Ragbi Futbol lig Sir Bob Sinclair.

bihain taim bilong ragbi lig bai gutpela long wanem tupela kampani i soim laik long sapotim Lae ragbi lig taim lig i ron stret.

Em i tok: "Na i gat wanpela rot tasol long kamapim dispela. Em long larim olgeta samting i ron plesklia (trensperensi) na olsem

mipela i tok yesa long olgeta samting mipela i mekim (akauntabiliiti) long ol wok bilong Lae ragbi lig."

Ol nupela Eksekutiv bilong Lae ragbi lig em Nandoma (presiden) Sinclair (namba tu presiden), Martin Surab (sekretari) na Kepson Papita (tresera).

Dispela ol opisol em ol presiden bilong ol 10-pela klab insait long Lae ragbi lig i makim, we siaman bilong Papua Niugini Ragbi Futbol Lig (PNGRFL), Sir Bob Sinclair i go pas long en.

Long dispela taim, Nandoma i tok em i bin gat tingting long kamapim wanpela gutpela ragbi lig long kantri taim em i kisim opis bilong presiden long 2001.

Tasol dispela i no karim kaikai taim olpela siaman bilong PNGRFL, John Numapo i rausim em.

"Mi gat driman na plen long dispela Lae ragbi lig na senisim dispela ples tasol dispela i no karim kaikai long wanem ol i bin pinisim mi. Tasol nau mi kam bek gen na mi bai putim ol plen na driman bilong mi," em i bin tok.

Tasol dispela i no inap wok sapos i nogat sapot bilong olgeta klab opisols.

"Mipela i mas wok bung wantaim long mekim ol dispela samting i kamap ples klia. Mipela olgeta i mas givim han long senisim dispela ples," em i tok.

Em i tok aninit long lukaut bilong Sir Bob Sinclair olsem siaman bilong PNGRFL, bihaintaim bilong lig bai orait olsem na mipela olgeta i mas wok bung wantaim.

Planti ol pilai no bihainim lo: Vavine

Planti ol pilai long kantri nau i kisim rot we bagarap i ken kamap isi, PNG Spot Komisen program menesa Scott Vavine i tok.

Em i tok dispela kain pasin i kamap ples klia long taim stori long Pos-Kuria bilong Trinde Januari 11, 2006 long baksait pes i stori long dai bilong tupela yangpela ragbi lig pilaia

long Dei distrik long Westen Hailans provins i dai long wanpela ov sisen ragbi lig pilai long Januari, stat bilong dispela yia.

Dispela stori i tok long tupela pilaia i kisim bagarap long bodi bilong tupela insait long pilai we ol i kisim ol i go long Mt Hagen Haus sik we ol i lusim laip bilong ol.

Ol dokta bai painim aut yet long as tru bilong hevi bilong

dai bilong ol long bagarap ol i kisim long bodi bilong ol.

"Long tingting mi kisim long stori mi ritim mi inap tok olsem dispela ov sisen pilai we i kamap i kamap nating. Ol oganaisa i no bihainim ol bikpela lo bilong holim pilai we sapos i kamap dispela tupela dai bai i no inap long kamap," Vavine i tok.

"Sapos yu glasim gut yu bai luksave olsem planti samting

we i mas kamap bihain ol lo bilong pilai i no stap taim dispela pilai i kamap," em i tok.

Em i tok long holim kain pilai olsem husat man i kamapim i mas i gat inap na gutpela save bilong holim ol.

"Bikpela samting em sefti (gutpela) bilong ol pilaia. I olsem pilai i mas kamap long wei we i nogat bagarap i mas kamap long laip bilong ol man, ol samting o pilai yet."



# Tripela nupela klab soim laik long POM lig

**ragbi**

Paul Zuvani i raitim

TRIPLELA nupela klab i soim pinis laik long joinim Pot Mosbi Ragbi Lig resis, siaman bilong Pot Mosbi Ragbi Futbol Lig Solomon Ravu i tok long taim lig i wok long redi long holim 2006 sisen pilai.

Ravu i tokaut long dispela long taim planti ol tim i wok long isi isi long baim afiliesen fi bilong ol.

"Sampela klab em mipela i soim ol tok lukaut pepa olsem sapos ol i no bihainim ol lo bilong lig i gat atoriti o rait long rausim ol," Ravu i tok.

"Long dispela as em i bikpela

samting olsem ol i bihainim ol lo na wanem samting em lig i askim long ol," em i tok. "Ol i mas kamap wantaim ol afiliesen fi, soim ol miting bilong klab bilong ol long taim bilong Eneul Jenerol Miting (AGM), soim ol pilaia namba bilong ol pilaia bilong ol na ol opisel wantaim. Ol i mas soim tu ol yunifom na tokaut long ol junia tim bilong ol."

Lig nau i singaut long ol klab olsem DCA, Waliya, Royals, Puma, Magani, West, Dobo Warriors na Kone Tigers na Pot Mosbi Referi Asosiesen. Dispela ol klab na asosiesen i mas hariap long ringim opis bilong Pot Mosbi Ragbi Lig long telepon namba 325 3525 long tokaut long laik

bilong ol long 2006 sisen na long wok bilong ol.

Ravu i tok long taim sampela ol nupela klab i soim laik long joinim lig long wankain taim ol i bin tokaut tu long kamapim sampela ol nupela tingting long go insait long pilai we dispela i nogat tok long en.

De bilong ol klab i pinisim pe bilong afiliesen fi bilong ol na salim ol toktok bilong ol em long Februari 3, 2006.

Bihain long dispela AGM bai kamap long Sande Februari 5, 2006. Ol klab husat i no mekim ol samting long taim bai lus long 2006 sisen.

Ravu i tok long kamap long 2006 AGM em i gutpela olsem ol

i mas kamapim wantaim ripot bilong ol long 2005 sisen.

Em i tok bikos long namba bilong ol klab husat bai kamap long ol pilai gren fainol bilong Lig bai kamap long Oktoba 1, 2006.

Na SP Kap pilai bai kamap long Epril na pinis long Ogas tasol dispela i no klia inap opis bilong SP Kap Tras yet i tokaut long dispela.

Ol narapela samting we bai kamap long miting em long kamapim 2006 kalenda, we AGM bai kamap long Februari 5, PRL Naines (9s) tonamen long las wiken bilong Februari, raun SP POM Lig pilai long Mas 11 we ol NRL pilai i stat tu wantaim.

# 5-pela pilaia wantaim bagarap long go long Melbon Komenwel Gem

**Melbon Gem**

Paul Zuvani i raitim

FAIVPELA pilaia wantaim bagarap long bodi bai go wantaim PNG tim long Mas 15 Melbon Komenwel Gem, nesenel disabiliti spot progrem menesa Sophie Tuna i tok long PNG Spot Komisen i tok.


Ol etlit em powalifta Rex Larry (Lae), Kupuni Lewa (Mt Hagen), Rabaul spitman Francis Kompaon na ol swima Benjamin Warkit (Kimbe) na George Kikimbi (Rabaul).

Tupela swima i bin painim hat long bungim kwalifaing taim bilong Intenesenel Paralimpik Komiti long hevi bilong mani long sponsaim ol long go long dispela ol kwalifaing pilai.

Tasol bihain liklik nau ol i kisim toksave long komiit olsem ol i ken kamap long 50m na 100m fristail.

Na long ol pawalifta ol i bin go pilai long Asia Pawalifting Sempionsip long Malaysia we Larry i win brons medol long 90kg divison na nau yet i stap namba foa ples long wol.

Na Lewa i kamap namba 7. Long lain husat i resis em



**TAIM BILONG REDI:** Mt Hagen welifta na namba 7 welifta wantaim bagarap long wol Kupuni Lewa i traim ol ain long redim em yet long ol pilai.

Kompaon i bin mekim gut long Krismas Pasifik Skul Gem long Melbon we em i winim tupela gol medol long 100m na 200m sprin. Long amamas long tim i go Tuna

i tok: "Olgeta Papua Niugini i mas putim ai long dispela ol pilaia long wanem i gat planti na gutpela sans long dispela ol etlit i winim ol pilai na inap tu long winim medol."

Na EAD (Elit Emetik wantaim Bagarap) grup bilong PNG long Komenwel Gem i redi long kamap long sampela ol lokel pilai na traim strong bilon ol.

Dispela ol etlit bai stap insait long sampela ol trening progrem long Melbon stat long Mas 6 i go inap long 10.

Long dispela trening ol etlit bai lukluk long ol teknik, samting we ol bai mas kaikai na dring long em, redim ol yet long tingting na long lukim olsem olgeta strong na save ol etlit i gat long en em ol i yusim insait long ol pilai.

Long taim ol i tren ol etlit bai stap wantaim wankain ol resis man na meri bilong ol olsem ron man Kompaon bai stap wantaim etlit tim, Lewa na Larry wantaim welifting tim na ol swima bai stap wantaim ol swimming tim.

Tim menesa long go wantaim tim em Sophie Tuna.

Long ol narapela nius PNG Disabiliti Spots Federesen bai holim miting long Lae long redim 2006 Nesenel Gem bilong ol pilaia wantaim bagarap.

Long 2004 pilai inap olsem 250 spotmanmeri wantaim baragap i kamap long dispela ol pilai.

# Brothers bai skruim yet win long Hohola ov sisen lig

**ragbi**

Paul Zuvani i raitim

KOMETISEN liga Muturus Brothers bai lukluk long skruim yet win bilong ol long Hohola ov sisen ragbi lig.

Ol i go pas wantaim 21 poin we bihainim ol em 29 Dogs na husat i gat 19 poin, MB Reds (18) na Osi Osi Panthers (17) na sampela moa ol tim i stap daunbilo long dispela 20 tim ov sisen ragbi lig pilai.

Las wik ol Brothers i bin nekim Toks Valley 18-4 na long dispela wiken ol bai bungim Toks Warriors husat i gat 9 poin na stap long 13 ples long mein gem. Dispela bai i isi pilai we i gat bilip olsem ol Brothers inap pinisim win bilong ol



**NOKEN!** Raiders Namona pilaia i pret long kisim han long SI Sea Eagles long bilong ol long las Sarere. Eagles win 10-6.

Warriors. I gat sampela moa pilai bipo long lig i go insait long gren fainol bilong ol na kain ron olsem bilong ol Brothers inap tokaut olsem ol inap go insait long fainol. Narapela pilai we ol manmeri bai lukluk long em em pilai bilong ol 29 Dogs egensim JV Bulldogs long Sande na MB Reds egensim Kama Cowboys.

Bikos Dogs wantaim Reds i wampela poin i mekim tupela i narapela narapela dispela tupela pilai bai soim husat bai kalapim narapela narapela.

Na olsem ol narapela tim tu bai mekim olgeta samling long winim ples long go insait long fainol na olsem ol pilai bai strong.

Ol bikpela pilai em Osi Osi Panthers egensim Figgy Duumpers long Sarere na Hoks Magpies egensim Kama Cowboys long Sande.

Hap hap spot

SP Bruweri givim K42,000 long Ragbi 7s

**ragbi**

GUTPELA bia bilong mipela SP Bruweri long dispela wik i tokaut long K42,000 sponsasip em i mekim long wokabaut bilong PNG Ragbi 7s long wol ragbi 7s pilai long Wellington, Nu Silan narapela wik Fraide i go inap long Sande (Februari 3-5). PNG tim bai lusim sua long dispela Tunde. Long tumora PNG Ragbi Futbol lig bai tokaut long fainol fis bilong ol pilaia husat bai go. Kosa em Sailosi Droma na menesa em Malcolm Giheno. Long trening skwat em ol kisim ol pilaia long Pot Mosbi, Lae na Goroka.

Nades gat bilip long PNG kriket

**kriket**

OL tingting bilong PNG i kisim gol long 2007 Saut Pasifik Gem long Samoa i kamap tru taim PNG Kriket Bod siaman Mick Nades i tokaut long dispela taim em i amamas long gutpela pilai em ol PNG pilaia i mekim long EAP tim we i winim Saut Australia na sempion Kwinslen long Australia Kantri Kriket Sempionsip (ACCC) long wik i go pinis. 9-pela pilaia husat i stap long EAP tim wantaim ol pilaia bilong Fiji, Japan na Malaysia em kepten Rarua Dikana, John Ovia, Ipi Morea, Gimapau Keimelo, Hitolo Areni, Arua Uda, Mahuru Dai, Assad Vala na Jamie Brazier. Tripela pilaia husat i kisim awot em Rarua Dikana, Ovia na Morea.

43 long Is Nu Britan volibol tonamen

**volibol**

FOTI tim olgeta i redi long kamap long Is Nu Britan volibol tonamen we i stat long nau long Baliara Polis pilai graun. I gat 20 tim bilong ol man na 20 tim bilong ol meri. Siameri bilong tonamen Dulcie Boas i tok olsem dispela tonamen i bin stat long 2001 tasol bihain long dispela i no moa ron long narapela foapela yia inap nau ol i kamapim gen. Em i tok as tingting bilong kamapim dispela ol pilai em long developim ol yangpela na long kamapim spirit bilong wanbel, uniti na fridom pasin na long lukim ol pilaia i soim stret gutpela spirit bilong pilai. Ol tim bai kam long Lasul Baining, Kokopo na Rabaul na long Not Kos Rot.

Tenk yu PJV

**spot**

LAIAGAM Distrik Spot Asosiesen i tok tenk yu long Porgera Join Vensa (PJV) long sapot ol i givim long distrik i holim distrik pilai bilong ol. Presiden Daniel Pimbi i tok PJV i kamapim kain helpim we em i hat long painim long dispela taim long taim kantri i bungim hevi bilong mani. Em i tok helpim em kampani oltaim i save givim long taim ol pilai i gutpela long wanem dispela i helpim ol manmeri long develop long spot. Em i tok kampani i bin gutpela tu taim em i stretim K700 levi fi bilong ol long 2005 Papindo Gems long Goroka. "Mi amamas na tok tenk yu long sapot em yupela i givim," Pimbi i tok.

Pangia laikim helpim

**ragbi**

PANGIAN ragbi lig long Saunten Hailans painim K50,000 long statim 2006 sisen. Lig presiden Michael Ambros askim ol bisnisman na wanwan Pangia manmeri long helpim.

**LAE BISCUIT CO.**

LAE BISCUIT CO.  
BIKPELA NA STRONGPELA

**WANTOK**

# SPOTS

**LAE BISCUIT CO.**

LAE BISCUIT CO.  
BIKPELA NA STRONGPELA



**Pes 29**  
Ovasis ragbi-Prince fakaut long tingiang bilong em

# Vele sponsaim Sentrel SP Kapetim

OLIMPIA H...  
KAMANI BILONG YUMI



**BAI YU GO WE!** Sentrel ragbi lig 9s kompetisen we long Krismas taim i bin lukim ol 32 tim long ol ragbi lig timlong provins i kamap salens. Hia em .Rovanama 2 (wantaim bal) na Poinimo husat i kamap na brukim bun long dispela taim. Rovinama 2 win 16-0. Kain kompetisen i mekim Vele i bilip olsem Sentrel provins inap kamapim tim we inap kamapim gutpela salens. *Lukim stori pes 30*

## SHARP RADIO CASSETTE RECORDER

PNG's No. 1 Brand TOP QUALITY MODELS TO CHOOSE FROM

<p><b>K779.00</b> GXCD1300V</p> <ul style="list-style-type: none"> <li>● Portable VCD/CD Stereo Component System ● PMPO 200W</li> <li>● 2 Way 4 Speakers Surround Sound System and MP3 Function</li> <li>● 3 Band Graphics Equalizer</li> <li>● Variable X-Bass System</li> <li>● 4 Band(FM/ AM/SW1/ SW2) Tuner</li> </ul>	<p><b>K97.00</b> QT22WBK</p> <ul style="list-style-type: none"> <li>● Radio Cassette Recorder that Delivers Quality Sound on the move ● PMPO 20W</li> <li>● ALC ( Automatic Record Level Control) Soft Eject Cassette Mechanism</li> <li>● 4 Band(FM/SW1/SW2/MW Tuner ● Built-in Condenser Microphone</li> </ul>	<p><b>K219.00</b> QTCD700W</p> <ul style="list-style-type: none"> <li>● Compact and Stylish Portable CD Stereo System with Cassette Desk</li> <li>● PMPO 32W Built-in CD player</li> <li>● Built-in Cassette Deck</li> <li>● Built-in Inner Microphone</li> <li>● LCD Display for CD</li> <li>● 20-Programmable Playback for CD .AM/FM Stereo Tuner</li> </ul>
--	--	--

**BUY WISELY - ALL PRODUCTS BACKED BY BRIAN BELL'S WARRANTY, SPARE PARTS & SERVICE**      **AVAILABLE AT ALL BRIAN BELL STORES & AUTHORISED SHARP DEALERS NATIONWIDE**      Distributed by: **Brian Bell** *Shop with a friend*